

2 CORINTIOS

Pablo queédih ã túyat tútat

¹ Weém, Pablo, biíhdih daacát túttnit, yeéb Corinto tútchidih moón Jesúíhwādh wã wahna caá.* Dios ã náahat pah, Jesucristoíh doonádh ã naáwát túttni wã jumna caá. Nin náodih wahna, jwĩ úud panihni Timoteojĩh yeebdíh búdí jwĩ túyat túttna caá. Bitá Acaya baácđih moón Jesúíhwābút nin wã daác wahnidih ĩ joyó naáh. ² Jwĩ íip, jwĩ Maáh Jesucristobút yeebdíh búdí oinit, ĩ teo wáaca naáh, biícđih ñi túi jummat pínah niijná.

Ded pah yeejép yapat

³ Jwiítđih en jĩgahnit, Dios ãpĩ teo wáacna caá. Páant ã teo wáacachah, caán, jwĩ Maáh Jesucristo ã íipđih búdí wēinit, “Jwiítđih búdí oinit, ma teo wáacat túina caá, Paá”, niiját caá jwiítđih náahap. ⁴ Yeejép jwĩ yapachah, jwiítđih caanjéh ãpĩ túi teo wáacna caá, bita yeejép ĩ yapachah, queédihbút jwĩ teo wáacat pínah niijná. ⁵ Nin baácboó Jesucristo jum láa, túbít yeejép át yapap wut jĩ. Āih túini doonádh bohéna, caán Jesús ã yapatji pah muntih jwiítbút dawá láa túbít yeejép jwĩ yapna caá. Jesucristoíh jumna, páant yeejép jwĩ yapachah, Dios jwiítđih búdí ãpĩ teo wáacna caá. ⁶ Pánih yeejép yapna, yeebdíh jwĩ jéih teo wáacna caá, Diosđih chah ñi túi jenah joyát pínah niijná. Yeejép yapna, Dios jwiítđih ã teo wáacachah, jwiítbút yeebdíh jwĩ jéih teo wáacna caá, ñi jĩgahat ã yayát pínah niijná.

* **1:1** Hch 18.1

Jwĩ yeejép yapat pahjeh muntih, yeebbát yeejép ñi yapachah, “Dios ã túi teo wáacbipna caá”, niúj jenah joinít, caandíh ñi cádahcan niít. ⁷ Pánihna, “Weém yeejép wã yapat pahjeh muntih, queébtut yeejép i yapna caá. Dios weemdíh búdí ã teo wáacat pah, queédihbut búdí ã teo wáacachah, caandíh i túi jenah joí cádahcan niít”, wã niúj jéihna caá.

⁸ Bũũ wã údwã panihnitá, nindih ñi túi náhninaá: Weém Asia baácboó jum láa, tubit yeejép wã yapap jĩ. “Wã jéih bũũjácana niít. Wã wunbipna caá.* ⁹ Weemdíh i mao yohbipna caá”, wã niúj jenah joyóp yuh jĩ. Obohjeéhtih, Diosboó páant át yapat túttup tajĩ, “Weemjéh wã jenah joyátjĩh wã jéih chájna caá”, wã niúj jenah joicát pínah niijná. Caán, chah wēpni jumna, wanah bejnitdih jwúub booani jumna, weemdíh ã teo wáacat pínahboodíh bidat caá náahap. ¹⁰ “Wã jibipboó búdí tobohat ã jumuchah yuhna, Dios ã teo wáacachah, wã túi yapap jĩ. Táltimahbut, biíc yoobó muntih ã túi teo wáacatjĩh wã túi yapbipna caá”, wã niúj jéih caá. ¹¹ Yeéb ñi úbúchah, jwiít dih oinit, Diosboó ã túi teo wáacbipna caá. Páant ã teo wáacat doonádih joinít, dawá úbhñit, “Túina caá, Paá. Pablowádih mat túi teo wáacat wut be”, wēinit, i niijbípna caá.

Pablo Corinto tútchiboó ã jwúub bejihat

¹² Biquína ñijeéh jumnit weemdíh yeena caá it chájap. Obohjeéhtih, tíccanjeh, wēinit, “Dios ã teo wáacatjĩh ã náahat pahjeh queédih, bitadihbut túinijeh wã pej jum bohénap jĩ”, wã niúj jéihna caá. Weém yeecanjeh, yeebdíh yoobóp dih wã naáwáp

* 1:8 1Co 15.32

jĩ. Wã jenah joyátjĩh nihcan, Dios weemdíh oinit, ã teo wáacatjĩh, ñijeéh wã túi јммр јĩ.

13-14 Yeebdíh naóh daácna, бшсcannijeh wãpĩ daácna caá, ded pah wã bohéatdih ñi túi jéihyat pínah niijná. Obohjeéhtih, бшс wã naáwát dih ñi túi beh joi jwáhcan yáhna, túttimah, ñi túi beh joyát pínahdih yeebdíh búdí wã náah yacna caá. Pánih beh joiná, јwĩ Maáh Jesús ã јwúub dei јúúwúchah, “Pablo јwíitdih ã túi bohénap јĩ”, weemdíh wēinit, caandíh ñi niijbípna caá. Biíc yoobó yeebdíh wēinit, “Wã naóhniji táini doonádih queét ĩ túi jepahap јĩ”, weembát Jesúsdih wã niijbípna caá.

15-16 Páant ñi weñat pínahdih jéihnit, Éfeso tútchiboó јм јwáhna, “Queét Corinto tútchidih moón Jesúhwá dih јuibí bohénit, Macedonia baácna bohénadilh wã bejbipna caá. Macedonia baácboó јмniji Judea baácna јwúub bejat túut, queét Corintodih moondíh chéneji teo wáacat túut niijná, queétdih wã en yap bejbipna caá. ĩ pebh јмni Judea baácboó wã јwúub bejat pínahdih jéihnit, queétboó weemdíh ĩ túi teo wáacipna caá”, wã niij jenah joyóp yáh јĩ. Obohjeéhtih, pánih jenah joiná yáhna, wã jéih bejcap јĩ.* 17 Ñi pebhna wã bejat pínah doonádih joinít, wã јuibícah enna, “Pablo nih yáaniabeh tagaá”, ¿ñi niij jenah joí niit? 18 Páant ñi niij jenah joicá bojoó. Dios ã niijátji pahjeh biíc yoobó ã chãjat pah, weembát yeeni nihcan caá.

19-20 Weém, Silas, Timoteojĩhbut Dios wúuh Jesu-cristo ded pah ã chãjatjidih yeebdíh јwĩ bohénap јĩ.* Jesucristo nin baácboó ã cãac јмат pínah jãtih, Diosboó ã wúuh ded pah ã chãjat pínahdih

* 1:15-16 Hch 19.21

* 1:19-20 Hch 18.5

ãt naáwáp wut jĩ. Pánihna, Jesucristo ã íp ã naáwátji biíc yoobó ãt chãjap wut jĩ. “Jújuh Paá, ma chãjat tútatdih wã chãjbipna caá”, ãt niúj jepahap wut jĩ. “Páant wã chãjcan niít”, ãt niijcáp wut jĩ. Pánihna, “Jesucristo chah Maáh caá”, jwĩ niúj jéihna caá. Pánih caandih túi jenah joinít, ã naáwát dih jepahna, Diosdih wēinit, “Yoobóp dih tigaá ã niiját”, jwĩpĩ niijná caá. ²¹⁻²² Jesucristodih jwĩ túi jenah joí cádahcat pínah niijná, Dios jwiít dih, yeebdíhbut ã túi teo wáacna caá. ãihwã jwĩ jumat pínah niijná, jwiít dih ãt ñiwip wut jĩ. Pánih ñionit, jwiít dih búdí teo wáacat náahna, ãih Túini Espíritudih ãt wahap tajĩ, jwĩh caolihboó ã jumat pínah niijná. “Dios pehbhoó ñi jumuchah, yeebdíh chah búdí ã túi chãjbipna caá”, Túini Espiritu jwiít dih ã niijíchah, jwĩ túi jéihna caá.*

²³ Bũ jwuhna, wã jenah joyátjidi wã jwáub túut numát dih yeebdíh yoobóp dih wã naóhbipna caá. Wã yeenachah, Dios wĩh jenah joyát dih jéih beedáni, ã peéh chãjbipna caá. Yeebdíh enedih búdí wã bejihna yuhna, “Weemdíh enit, queét ì tícbipna caá”, niúj jenah joinít, ñi pehbhoó bejcanjeh, nin Macedonia baácna wã jwĩh juyúp jĩ. ²⁴ Diosdih jepahnit ñi jumuchah, yeebdíh tabit wutni dée ñijeéh wã jumíhcan caá. Obohjeéhtih, ñijeéh túinijeh jumna, yeebdíh búdí wã teo wáaquíhna caá, Diosdih túi jenah joí cádahcanjeh, chah ñi weñat pínah niijná.

2

¹ Con láa yeebdíh enedih bejna nihna, ñi yéej

* **1:21-22** Ef 1.14

chãjat peéh jũihna, yeebdíh búdí wãta jĩgaha tagaá. Pánihna, Éfeso tútchiboó jumna, jib bejatdih jenah joinít, “Queétdih jwúub jĩgahaíhcan, ĩ pebhna wã bej jwuhcan niít”, wã niíj jenah joyóp jĩ. ² Yeéb ñi jĩgahachah ennit, weembát búdí wãta jĩgah tagaá. Pánih míc jĩgahanit, jwĩta míc jéih jwúub weñacan tagaá. ³⁻⁴ Pánihna, ñi pebhna bej jwuhcanjeh, ñi yéej chãjatdih ñi cádahat pínah niijná, wã daác wahap jĩ. Ñi míc ámohat pínah jãtíh bejna nihna, búdí wãta jĩgahap taga. Pánih búdí jĩgahna, jãinít, yeebdíh túicaíhcan, yeebdíh búdí wã oyatdih ñi jéihyat pínah niijná, páant wã daác wahap jĩ. Jwĩ jwúub míc enna, túut nuumnít, táinijeh ñi jumuchah enna, wã túi wẽibipna caá. Yeebbát ñi túi wẽibipna caá. “Queétboó túi jepahnit, táinijeh ĩ jumbipna caá”, wã niíj jenah joiná caá.

Yéej chãjnijidih ĩ jwúub waadát túutat

⁵ Ñijeéh jumni túbit yéej chãjni weemdíh ã jĩgahanap jĩ. Yeebdíh bácah chah át jĩgahanap taga. ⁶ Jáantjeh yeéb míc wáacnit, ã yéej chãjat peéh, caandíh bacanit, ñit jwúub waadát túutcap wut jĩ. Páant ñi peéh chãjatdih náhninit, ã yéejatdih jĩgahna, át túut nuumúp wut jĩ. ⁷ Bũ, ã yéejatdih quíib buudnit, caandíh ñi míc wáacapboó ñi jwúub waadát túutú. Á jĩgahat yayáchah, jwĩ Maáhdih ã cádahcat pínah niijná, caandíh ñi túi teo wáacá. ⁸ Caandíh táinijeh ñi jwúub pej jumúú, “Weemdíh ĩ túi oina caá”, wẽinit, ã niíj jenah joyát pínah niijná. ⁹ Jãtíh yeebdíh daác wahna, “¿Wã wutuchah, ĩ túi jepahmi niít?” niíj jéihíhnit, wã daác wahap jĩ. Bũ ñi jepahatdih jéihna, wã wẽina caá. ¹⁰ Bũ

caán ã yéej chãjatjidih ñit jenah joí cádahap wut be. Weembút wã jenah joí cádahna caá. Caán weemdíh ã yéej chãjcah yuhna, yeebdíh teo wáacat túut niijná, Cristo ã enechah, ã yéejatjidih wã jwúub jenah joicán niít. Páant wã jenah joicát dih ennit, yeebbút ñi jenah joí cádahbipna caá. ¹¹ Páant caán ã yéejatjidih jwiít dih jwúub jenah joicát caá náahap, ã tíicat yayáchah, nemépwã ñ maáh, Satanás, ã náahat pah ã chãjcat pínah niijná. Æ yéejatjidih páantjeh jenah joiná, Satanás dih jwíta jepah tagaá. Satanás ded pah jwiít nihat dih ã yéej chãjíhat dih jéihcannit jwí nihcan caá.

Titodih jwãáhcan, Pablo ã náhni dahwaat

¹² Éfeso tátchimant bejni Troas tátchina jãibínit, Cristoíh táini doonádih wã naáwáchah, dawá ñ táí joyóp jĩ. “Dios ã teo wáacachah, caandíh jepahnit dawá ñ jumna caá”, wã niij wëi jenah joyóp jĩ. ¹³ Páant wã jenah joiná yuhna, wã úud panihni Tito, ñi pebhna wã wahnidih jwãáhcan, weémboó búdí wã náhni dahwanap jĩ. Pánih náhni dahwanit, caanjíh moondíh “Wã bejna caá”, niijnít, nin Macedonia baácboó caandíh bididih wã jũúwáp be.*

Cristo jwiít dih eníhcannidih ã yap yohat

¹⁴ Páant wã náhni dahwana yuhna, Cristoíhwã jwí jummat dih jenah joinít, Dios dih búdí wã wëina caá. Cristo Satanás dih yap yohni ã jumuchah, Satanás jwiít dih ã yéej chãjat túutuchah yuhna, Cristoíhwã jumna, jwiítbut caandíh yap yohnit jwí jumna caá. Dios nihat dih Cristoíh doonádih

* **2:13** Hch 20.1

jwiít dih ã naáwát túutap be, Satanás dih Cristo ã yap yohatjidih ã jéihyat pínah niijná. Pánihna, Cristodih jéihnit, búdí wēinit, nihat caandíh ã táí jenah joiná caá. ¹⁵ Cristoíh doonádih jwī naóh peét bejehah enna, Dios búdí wēinit, “Wã wāúh Cristo panihnit ã jumna caá”, ã niíj jenah joiná nacaá. Biquína jwī naóhni táini doonádih joinít, táí jepahnit jumna, iiguípna bejat déejidih Dios ã táí ubnit ã jumna caá. Obohjeéhtih, bitaboó, joiná yuhna, ã jepahcat peéh iiguípna bejnit pínah ã jumna caá. ¹⁶ Nin pah jwīpī niíj naóh bohéna caá: “Cristodih ñi jepahcatji peéh iiguípna bejnit, tubit yeejép ñi tubaat ã yaicán niít. Obohjeéhtih, Cristodih táí jepahnit, Dioíh táini pehbóó ñi bejehah, búdí ñi weñat ã yaicán niít”, jwīpī niíj naóh bohéna caá. Páant, jwī niíj naáwáchah joinít, íijnit, biquína ã joíhcah yuhna, bitaboó ã táí wēi joiná caá. Obohjeéhtih, jwī Maáh Cristo jwiít dih ã teo wáacchah, áih táini doonádih yoobópdih jwī naóhcah, beh joicán, nihat íta wēi joicán taga. ¹⁷ Dios naáwát dih bita bohé jibnitboó, jíb náahna, yoobópdih ã bohécan caá. Obohjeéhtih, páant ã bohéat pah jwiítboó jwī yee bohécan caá. Dios ã naáwát túutnit jumna, caán ã enechah jéihnit, yoobópdih jwīpī bohéna caá.

3

Pablowã Jesúhwãdih teo wãhñit ã jummat

¹ Bitã ã niiját pah, “Dedé jéihcat pínah weemdíh wihcan caá”, weémboó wã niijcán caá. Yeeb weemdíh táí jéihna, “Pablowã yoobópdih ípī bohéna caá”, niíj jenah joinít, páant bitã ã niíj daác wahatdih ñi náahcan caá. Yeebbút bitadih páant

ñi niij daác wahatdih wã náahcan caá. Obohjeéhtih, bitadih jéihcan, páant daác wahatdih ñita náah taga. ² Yeebdíh jwĩ bohéniji túini doonádih joinít, ñi túut nuumúchah ennit, “Dios ã teo wáacatjĩh Pablowã queétdih ï naáwáchah joinít, ï jenah joyátdih ït túi túut nuumáp taga”, bita ï niij jéihna caá. Páant niij jéihnít, Dios ã bohéát túutnit jwĩ jumatdihbat ï jéihna caá. ³ Pánihna, jwĩ túi bohénachah, ñi túut nuumátji doonádih joinít, Cristo jwiít dih ã bohéát túutatjídih nihát ï jéihna caá. Dios báadhni áih Túini Espíritu ã teo wáacatjĩh, yeebdíh jwĩ naáwáchah, ñi túi jepahap jĩ. Cristoih doonádih jwĩ bohénachah joinít, ñi jwíih túut nuumátji doonádih bita ï joyóchah, yeebboó queétdih jwĩ daác wahat panihnit ñi jumna caá.*

⁴ “Cristo jwiít dih ã wun wáhatjĩh Dios ã túi teo wáacna caá”, ñi niij jenah joyóchah jéihna, jwiítboó “Túini Espíritu bádí ã teo wáacatjĩh Dios naáwátdih queétdih jwĩ túi bohénap jĩ”, jwĩ niij wēi jenah joiná caá. ⁵ Pánih wēinit, “Weém wã jenah joyátjĩh nindih wã jéih chájna caá”, niijcán, “Dios ã teo wáacatjĩh jeh wã buujána caá”, wã niij jéihna caá. ⁶ Páant ã teo wáacatjĩh áih jáap naáwát, túini doonádih wã túi naóhna caá. Jon játih Dios jeé naanádih ã daacátjídih jwĩ nuowádih át jepahat túutap wut jĩ. Obohjeéhtih, caán máa wutatdih ï túi jepahat pínah wēpat queétbodíh át wihcap wut jĩ. Nin jáap naáwátbodíh jwĩ jepahat pínah niijná, Túini Espíritu jwiít dih ã teo wáacna caá, Diosjeéh jwĩ túi jumap pínah niijná.*

⁷⁻⁹ Dios ã wutatdih jeé naanádih daácnit,

* **3:3** Ex 24.12; Jer 31.33; Ez 11.19; 36.26 * **3:6** Jer 31.31

Moisésdih ã wãhuchah, Dios ã wẽpatjĩh Moiséih móot búdí ãt yeh iiguíp wut jĩ. Moisés jeemánt ã jwúb dei jãwúchah, ãih móot yeh iigát ã baáj jwúb bejehah yuhna, quíib ihana, queét Israel jaimenáji caandíh ãt jéih encap wut jĩ.* Jon jãtih Dios ã daácni wutatdih ã wãhuchah, ãjeéh ã túi jumat pínah niijná, caandíh túi jepahat ãt náahap wut jĩ. Obohjeéhtih, ã túi jepahcatji peéh iiguípna ãt bejep wut jĩ. Páant ã jepahcah yuhna, Moisés ã naóhni wutat túini ã jumatdih júutna, Dios búdí ã yeh iigát ãt jíghop wut jĩ. Bũ láa jáap naáwát, túini doonádih Dios ã naáwát túutuchah, Túini Espíritu jwĩ jepahat pínahdih ã teo wáacachah, chah túini jumna, chah yeh iigát panihni ã jumna caá. Caán jeé naanádih ã daácni wutatdih jwĩ túi jepahcatji peéh iiguípna jwĩta bej taga. Caán wutatdih jepahcan, ãjeéh jwĩ jéih jumcah yuhna, caán wutatdih ã wãhuchah, Dios ã túi yeh iigát ãt jíghop wut jĩ. Obohjeéhtih, bũ láa Jesucristoíh túini doonádih jwĩ jepahachah, iiguípna jwĩ bejat déejidih, Túini Espíritu ã teo wáacatjĩh Diosjeéh jwĩ túi jumna caá. Pánihna, jáap dooná chah túini caá ã jumap. ¹⁰ Bũ láa Jesucristoíh dooná jwiútdih búdí yeh iigní dée ã jumna caá. Obohjeéhtih, Moisésdih Dios ã daác wãhni wutat jwiútdih yeh iigcánni dée ã jumna caá. ¹¹ Caán wutatdih ã wãhuchah, búdí yeh iigát maátcanjeh ãt jum jwuhap wut jĩ. Pánihat pah, caán wutat túini jumna yuhna, bũdní pínah ãt jumap tajĩ. Obohjeéhtih, Jesucristoíh túini doonáboó ã bũdcán níit. Búdí yeh iigát ã jumuchah yuhna, máa wutatji bũdní pínah ãt

* 3:7-9 Ex 34.29

jumap tajī. Pánihna, buudcánni pínah jáap doonádih ã wũhchah, chah búdí yeh iigát dée ã jumna caá.

12-13 Moisés ãih móot yeh iigát ã baáj jwáub bejechah, yégueh chóojĩh át jãhap wut jĩ, queét Israel jumená ĩ encat pínah niijná. Obohjeéhtih, jwiitboó nin buudcánni dooná chah iigni dée ã jumuchah jéihna, tíccanjeh, yoobópdih jwĩ naóhna caá.* 14 Queét Diosdih jóíhcan, ĩih jenah joyátdih jãhat dée ã jumuchah, Moisés ã daacátjidih ĩt beh joicáp wut jĩ. Buu páantjeh caán daacátjidih ĩ en naáwáchah joiná yuhna, biíc yoobó ĩ jéih beh joicán caá. Cristodih jwĩ jepahachahjeh, caán jãhat déedih ã yohna caá. 15 Yeebdíh wã jwáub naóhna caá. Buubut queét Israel jumená jwĩ Maáh Cristodih jepahcan, Moisés ã daacátjidih páantjeh ĩ beh joicán caá. 16 Obohjeéhtih, det jwĩ Maáhdih jepahnitdih caán daacátjidih Jesúsboó ã túi beh joyána caá. 17 Jwĩ Maáhdih jepahnitdih Túini Espíritu ã jumna caá. Pánihna, jwiit Túini Espíritu jumnitdih Diosboó wēi ennit, “Queét yéejat peéh chãjat wihcannit caá”, ã niijíchah joinít, “Moisés ã wutatjidih jwĩ túi jepahcatji peéh jwiitdih ã wihcan niit”, jwĩ niij jéihna caá. Pánih jumna, jãhat dée wihcah, Diosdih túi jéihnit, jwĩ éum úbhcan caá. 18 Jwiit Cristoíhwã móot jãhat dée wihcan, “Caánboó chah túini caá”, jwĩpĩ niij jenah joiná caá. Páant niij jenah joinít, ã weñat pínahdihjeh chãjna, caán ã jumat pahjeh jumat túut niijná, yeó jáap jumat pah túi túut numná caá jwĩ chãjap. Jwiitdih Túini Espíritu ã teo wáacachah, jwĩ túi túut numná caá. Pánih táinidih jwĩ túut numáchah

* 3:12-13 Ex 34.33

ennit, “Queét chah túi jenah joiná caá ã chãjap”, bitaboó jwiít dih ã niíj jenah joibípna caá.*

4

Jesúih doonádih naóh nit ded pah ã jummat

¹ Túini Espíritu teo wáacni jumna, Dios weemdíh oinit, áih jáap túini doonádih ã bohé jibat túutap jĩ. Pánih bohéna, bita weemdíh yeejép ã chãjachah, jĩgahna yahna, wã bohé cádahcan caá. ² Ded pah wã bohéát dih nihat ã jéihyat pínah niijná, wãpĩ bih bohécan caá. Nihat joinít ã túi beh joyát pínah niijná, yeecanjeh, áih túini doonádih yoobóp dih wãpĩ bohéna caá. Dios weemdíh wēi ennit, “Pablo ã túi bohéna caá”, ã niijná caá. Bitabat wã bohénachah joinít, biic yoobó ípĩ niijná caá. ³ Obohjeéhtih, bita iiguípna bejnit pínah jumna, jáhat dée ã jumuchah, wã bohéát dih ã beh joicán caá. ⁴ “Cristo chah túini Maáh ã jumna caá”, jwĩ niíj bohénachah, Dios dih jéihcannit ã maáh, Satanás queéd dih ã beh joyát túutcan caá. Áih yeh iigát dih jáhat dée pah caá queéd dih ã chãjap. Dios ded pah ã jummat dih Cristo-jeh cãacwãdih ã túi beh joyána caá. Caán Cristo Dios yoobát caá. ⁵ Pánih bohéna, “Weemdíh ñi weñéé”, niijcánjeh, “Jwĩ Maáh Jesucristoboodíh ñi weñéé”, wãpĩ niíj naóh bohéna caá. Jwiít Jesúsdih oina, ñi maáh dée nihcan, yeebdíh teo wáacnitjeh caá jwĩ jumup. ⁶ Jon játih Dios nihat dih chãjna, “Dupúnarpoó yeh iigát ã jumna naáh”, át niijíp wut jĩ. Caanjéh jwĩh caolih dih yeh iigát dée ã jummat túutna caá. Pánihna, Cristo, chah túini ã jummat dih

* **3:18** Ro 8.29; Gá 4.19; Fil 3.10

jéihna, Dios biíc yoobó túini ã jumatdihbut jwĩ jéihna caá.*

Jesúihwã ãih wēpatjĩh ded pah ĩ chãjat

⁷ Weémboó wēpcanni, oboh jumni wáam dah dée wã jumuchah yuhna, Jesucristoĩh túini doonádih wã bohé jibat pínah niijná, Dios weemdíh ã ñíwip jĩ. Oboh jumni wáam dah diítboó chah táinidih jwĩpĩ yac ámohat dée wã bíbohna caá. Caán túini doonádih wã naáwáchah joinít, cãacwãboó ĩ túut numná caá. “Oboh jumni, wēpcanni wã jumuchah yuhna, Diosboó chah wēpni jumna, búdí ã teo wáacachah, ĩ túi túut numúp be”, wã niij jéihna caá. Bitabut, wēpcanni wã jumatdih jéihna, “Dios ã wēpatjĩh ĩ túut numúp be”, biíc yoobó ĩ niij jéihna caá.

⁸ Biquí láana weemdíh tubit ĩ jéihñuchah yuhna, Jesúih túini doonádih wã naóh cádahcan caá. Biíh láa ded pah Dios ã weñat pínahdih jéihcanjeh, “¿ded pah wã chãjbi?” niijnít, búdí wã jenah joiná caá. Pánih búdí jenah joiná yuhna, weemdíh ã teo wáacachah, caandíh wã túi jenah joí cádahcan caá. ⁹ Biíh láa bita weemdíh eníhcan, Jesúih túini doonádih wã naáwát peéh, yeejép ĩ chãjna caá. Páant yeejép ĩ chãjachah yuhna, weemdíh cádahcanjeh, Dios ãpĩ teo wáacna caá. Biíh láa ĩ wun mao jwejni yuhna, ã teo wáacachah, booni páantjeh wã jumna caá. ¹⁰⁻¹¹ Nin baácboó Jesús ã jum jwuhuchah, cãacwã caandíh ĩt mao yohop wat jĩ. Pánihna, weembút nin baácboó jum jwuhna, Jesúsdiħ ĩ mao yohatji pahjeh, ãih túini doonádih wã naóh jibat peéh, weemdíhbut ĩ mao yohíhna

* 4:6 Gn 1.3

caá. Obohjeéhtih, Jesucristo weemdíh ã túi wá-pachah, wã báadh jwáhna caá. Páant weemdíh ã teo wáacachah enna, “Jesúsboó báadhni, chah wēpni ã jumna caá. Caanjéh tigaá Pablodih wapni”, nihat cãacwã ï niij jéihna caá. ¹² Weemdíh ï mawíhichah yáhna, yeéboó wã naóhni doonádih joinít, Jesucristodih jepahna, Diosjeéh páantjeh ñi túi jumbipna caá. ¹³ Tãbit yeejép yapna yáhna, Jesucristodih wã túi jenah joí cádahcan niit. Jon jãtih Davidbut yeejép ã yapachah, nin pah ãt niij daacáp tajĩ: “Diosdih túi jenah joinít, ded pah ã naáwát dih wã naóh yapanap be”, ãt niij daacáp tajĩ.* ã túi jenah joyát pah muntih weembát jwĩ Maáhdih túi jenah joinít, ãih túini doonádih wãpĩ naóh yapana caá. ¹⁴ Pánihna, Jesúh túini doonádih wã naáwát peéh bita weemdíh ï mao yohochah yáhna, caandíh wã túi jenah joí cádahcan niit. “Jesucristoíh jumna, caandíh jwúub booani-boó weemdíhbut ã jwúub booabipna caá. Pánih booanit, weemdíh ñijeéh ã jumupboó ã waadát túutbipna caá”, wã niij jéihna caá. ¹⁵ Páant ã chãjat pínahdih jéihnit, yeebdíh teo wáacat túut niijná, yeejép yapna yáhna, wãpĩ bohéna caá. Wã bohéatdih dawá ñi joyóchah, yeebdíh oinit, Dios dawá iiguípna bejnit déejidih ã túi ubna caá. Pánihna, dawá caandíh “Túina caá, Paá”, ï niij wēi naóhbipna caá.

¹⁶ Páant jwiitdih ã chãjat pínahdih náhninit, búdi wēina, Jesúh túini doonádih wã yabh naóhcan caá. Yeó jáap jummat pah wíh bácah ã wēpca jũwúchah yáhna, caandíh chah túi jenah joiná caá wã chãjap.

* **4:13** Sal 116.10

17 Nin baácboó jwĩ jum jwuhuchah, yeejép jwĩ yapatdih búdí wã jenah joicán caá. Obohjeéhtih, Dios pebhboó jwĩ juibínachah, yeejép yapat wihcah, chah túi wēinit jwĩ jummat pínahdih wã túi jenah joiná caá. 18 Nin baácboó jum jwuhna, dedé jwĩ enni buudní pínahjeh caá. Obohjeéhtih, Dios pebhboó jumnidih buu jwĩ jéih encah yahna, ã buudcán níit. Pánihna, nin baácboó jwĩ ennidih búdí jenah joicánjeh, Dios pebhboó ded pah jwĩ jummat pínahdih wã túi wēi jenah joiná caá.

5

1 Nihat nin baácboó jumni buudní pínah ã jummatdih jéihna, “Jwĩih bácahbut buudní pínah ã jumna caá”, jwĩ níj jéihna caá. Jwĩ wunuchah, jwĩih bácah ã moópbična caá. Obohjeéhtih, jwĩ wunat túttimah, Dios jáap bácah jwiít dih ã jwúub wúhbična caá. Caán bácahjĩh jwĩ jwúub wuncan níit. “Pánih jumna, jáap bácahjĩh Dios pebhboó jwĩ jumbična caá”, jwĩ níj wēi jenah joiná caá. 2 Nin baácboó jum jwuhna, tubit yeejép yapna, biquí láana Dios pebhboó búdí wã jumíhna caá. 3 Yégueh chódih jwĩ dúwíhat pahjeh ã wúhni pínah jáap bácahboodíh búdí wã pãina caá. 4 Buu nin bácahdih yohíhcan yahna, jáap bácahboodíh wã pãina caá. Nin baácboó jum jwuhna, wĩh bácah ã moopát pínahdih jéihna, Diosjeéh páantjeh jummat túut níj ná, jáap bácah pínahdih búdí wã bidna caá. 5 Dios jwiít dih jáap bácah ã wúhat pínahdih jãtĩh át jenah joijíp taga. Pánihna, ãih Túini Espíritudih jwiít dih ã wúhuchah, caánboó “Yoobópdih jáap bácahdih meemdíh ã wúhbična caá”, jwiít dih ã níj jenah joyát túutna caá.

6 Páant ã chãjat pínahdih jéihnit, úumcan, wã jĩgahcan caá. Bũũ nin bácahĩh jum jwũhna, Dios pebhboó wã bej jwũhcan caá. 7 Pánih jumna, ded pah jwĩ yapat pínahdih jéih encan yũhna, Jesucristodih túi jenah joinít, “Ã niijátji pahjeh wã túi yapbipna caá”, wã níj jéihna caá. 8 Nin baácboó jum jwũhna, wã wunat pínahdih úumcanjeh, wẽi jenah joinít, jáap bácahĩh jwĩ Maáh Jesucristojeéh búdí wã jumíhna caá. 9 Pánihna, Dios pebhboó bejna, wã bej jwũhcanbut, biíc yoobó jwĩ Maáh ã weñat pínahdihjeh wã chãjĩhna caá. 10 Japboó jũibínit, jwiít nihat jwĩ Maáh Jesucristo pebhna jwĩ jũibí ñũhhipna caá. Páant jwĩ jũibí ñũhuchah, nin baácboó jumna, ded pah jwĩ chãjatjidih enniji jwĩ maáh ã ñĩobipna caá. Páant ã ñĩwichah, jwĩ jéih jweicán niít. Pánihna, biíc jwĩ Maáh ã weñat pínahdih ã túi chãjatji jĩib, ã túi wẽi naóhhipna caá. Obohjeéhtih, biíhboó ã túi chãjcatji jĩib, caandih ã wẽican niít. Páant jwĩ yapat pínahdih jéihna, jwiít dih túi chãjat caá náahap.*

Dios jwiít dih ã wẽi enat

11 Dios ninboó ded pah jwĩ chãjat dih enna, caán ã weñat pínahdih jwĩ chãjcatji jĩib ã peéh chãjhipna caá. Páant ã peéh chãjat pínahdih úum yacna, búdí teo wáaquíhna, cãacwãdih wã wẽp bohéna caá. Pánih bohéna, búdí oinit, wã teo wáaquíhatdih Dios ã túi jéihna caá. Pánihna, biíc yoobó ñi jéihyat pínahdih yeebdíhbut wã náah yacna caá. 12 Páant niijnít, “Dedé jéihcat pínah weemdih wihcan caá”, wã niijcán caá. Obohjeéhtih, bitaboó ì yee naáwáchah joinít, “Nihcan caá. Pablo túi

* 5:10 Ro 14.10

oinit, yoobópdiḥ jwiítḥiḥ ã bohéna caá”, ñi niiját pínah niijná, páant wã niij naáwáp be. Queét ï túi jíghatḥiḥjeh wēi jenah joinít ï jumna caá. “Nihat jwiít judíowã ded pah jwī chājatḥiḥ Pabloboó joyáh bojna, ã bohéat túican caá”, ï niij naóhna yuh caá. Páant niijnít, bita queétḥiḥ ï wēi enat pínahḥiḥjeh ï jenah joyát ã túican caá. Obohjeéhtih, ded pah ïih caolih ã jummatḥiḥ caá jenah joyát náahap. ¹³ Biquína weemdih jāihnitboó “Pablo tūbit yójah bohé jibna, jenah joicánni caá”, ï niij jāihna caá. Obohjeéhtih, Diosḥiḥ búdí weñahna, páant wã bohé jibna caá. Bitaboó weemdih eníhcannit, “Pablo ã jenah joyátjīhḥiḥ ã yee bohé jibna caá”, ï niijná yuh caá. Obohjeéhtih, yeebdih teo wáacat túut niijná, túi jenah joinít, yoobópdiḥ wã bohéna caá. ¹⁴ Cristo jwiítḥiḥ búdí ã oyochah jenah joinít, caandih jepahna, wã túi bohéna caá. Pánih oina, caán Cristo biícjeh jwī yéejat jíib bũdáátḥiḥ ã jíib chāj beedá wūhat túut niijná, jwiítḥiḥ át wun wūhup wut jī. Caandih jenah joiná, “Wīih pínah caá át wun wūhjip taga”, niij jenah joinít, jwiít nihat jwī yéejat jíib ājeéh wunnit panihnit caá jwī jumap. Jwī yéejat jíib bũdáátḥiḥ jíib chāj péanit panihnit jwī jumna caá. ¹⁵ Pánihna, Cristo nihat cāacwã jwī yéejat jíib át wun wūhup wut jī, caandih jepahnit, jwī náahat pah chājnitji túut nũmnít, ã weñat pínahboodih jwī chājat pínah niijná. Caán ã wunuchah yuhna, Dios át jwūub boonap tajī.

¹⁶ Jwī Maáḥḥiḥ jwī jepahachah, ded pah jwī jenah joyátḥiḥ ã túut nũmúp be. Jātih nin baácḥiḥ bóodih jenah joinít, ded pah cāacwã ï jíghatḥiḥjeh ennit, “Túinit caá. Yeejépwã caá”, jwī niij en

jwuhup be. Obohjeéhtih, buu páant jwĩ niij jenah joicán caá, buca. Jãtjih Cristodihbut pánih jenah joinít, “Caánboó cãacjeh caá”, wã niij jenah joyóp yuh jĩ. Buu caandíhbut páant wã niij jenah joyátjidih wã túut nuumúp be. ¹⁷ Ded Jesucristodih jepahni, ãih jumna, jenah joyát túut nuumní ã jumna caá. Ded pah ã jenah joyát túut nuumná, ded pah ã chãjatbut túut nuumní ã jumna caá. Jãtjih ã weñat pínahdihjeh chãjni ã jumup be. Buu, túut nuumná, Túini Espíritu ã teo wáacachah, Dios ded pah ã weñat pínahboodíh chãjni ã jumna caá, buca.*

¹⁸ Jwiítjeh páant jwĩ jéih chãjcah, Dios jwiít dih át túut nuumúp taga. Jãtjih, Diosdih eníhcannit jum jwuhna, ãjeéh jwĩ túi jum jwuhcap jĩ. Cristo ã wun wũhatjĩh jwĩ eníhcatdih Dios át cádahat túutup taga, ãjeéh jwĩ túi jumat pínah niijná. Pánih chãjnit, jwiít dih bitadih át naáwát túutup be, queébtut caandíh í eníhcatdih cádahnit, ãjeéh í túi jumat pínah niijná. ¹⁹ Nin pah caá ã niij naáwát túutup: “Nihat yéejnit jumna, Diosdih eníhcannit jwĩ jumna caá. Jwiít dih bádí bidnit, Jesucristo jwĩ yéejat jíib ã wun wũhatdih jwĩ túi jenah joyóchah, ãihwã chãjnit, jwiít dih ã túi pej jumna caá”, ã niij naáwát túutup jĩ. ²⁰ Pánihna, Jesúsíh jumna, cãacwãdih nin pah wãpĩ niij naóh yapana caá: “Yeebút Jesucristodih jepahna, túut nuumnít, Diosjeéh ñi túi jumú”, wã niijná caá. ²¹ Jwĩ Maáh Cristoboó biícjeh yéejat wihcanni át jumup wut jĩ. Obohjeéhtih, ã yéej chãjcah yuhna, Diosboó caandíh jwĩ yéejat jíib át wun wũhat túutup wut jĩ. Jwĩ yéejat jíib buudáát dih Cristoboó át jíib chãj beedá wũhup wut jĩ. Páant

* 5:17 Jn 3.3-7; Gá 6.15

ã jíib chãj beedá wãhatdih enna, Diosboó jwiít Cristoíhwãdih ennit, “Queédih dedé yéejat peéh ã wihcan caá. Wã wãúhdih wēi enat pahjeh m̄antih, queétdihbut wã wēi enna caá, b̄uca”, ã niijná caá. Pánihna, Cristoíhwã jwĩ j̄um̄uchah, Dios túini ã j̄umat pahjeh m̄antih jwiítidihbut ã túi j̄umat túutna caá.

6

¹ Dios yeebdíh b̄adí oinit, teo wáacna, ñi yéejat peéh át yoh wãh̄up taga. Jwiít, yeebb̄ut Diosdih teo wũh̄nit j̄umna, nindih yeebdíh wã naóhna caá: ãihwã j̄umna, yeebdíh wã bohéátjidih ñi túi jepahna. “Wã jepahna caá”, niijná yuhna, ã náahat pah chãjcan, dedé pínah áta nihcan tagaá. Dios ã oyatdih yap yohnitjeh ñita j̄um tagaá. ² Jon jãt̄ih Dios naáwátidih naóh yapani nin pah át niij̄ daacáp tajĩ:

“Wã náahni yeó jáap yeebdíh b̄adí oina, ñi w̄ubátidih jepahnit, wã teo wáacap jĩ. Pánih teo wáacnit, yeebdíh wã túi w̄up jĩ, Dios ã niijná caá”, át niij̄ daacáp tajĩ. *(Is 49.8)*

B̄uu caá ã náahni yeó jáap ã j̄um̄up. B̄uu yeebdíh ã túi w̄bat pínah niijná, caandíh jepahat caá náahap.

Ded pah Pablo ã j̄umat

³ “Bitá wã bohéátidih ĩ jepahcan niit”, niijná, dedé yeejép chãjcan, yeejép wãpĩ wéhecan caá. ⁴ Túinijeh wãpĩ j̄umna caá, “Pablo Dios ã weñat pínahdihjeh chãjna, caandíh túi teo wũh̄ni ã j̄umna caá”, cãacwã weemdíh ĩ niiját pínah niijná. Dawá láa bita weemdíh yeejép ĩ chãjachah yuhna, weémboó íjcanjeh wã j̄umna caá. Dawá láa moh

yéejna yuhna, wã bohé cádahcan caá. ⁵ Nin pah caá yeejép wã yapap: Cãacwã weemdih ï mawachah; nemat muúboó ï nemechah; dawá íjnit, míc wáac junít, ï mao yohat túutachah, yeejép wã yapap jĩ. Weém búdí teona; quíib chei tubuchah yuhna, ñoca daa jũóhna; nuugúp wunna, yeejép wã yapap jĩ.* ⁶ Í náah chãjatdih jenah joicán, wã táí jumna caá. Yeebdih teo wáaquihna, jwĩ maáih táini doonádih táí jenah joinít, íjcanjeh, wã táí bohénap jĩ, ñi táí beh joyát pínah niijná. Yeebdih táí oinit, wã bohénachah, Túini Espíritu yeebdih ã teo wáacatjĩh ñi táí jepahap jĩ. ⁷ Áih táini doonádih naóhna, yeecanjeh, Dios ã wēpatjĩh wã bohénachah enna, caandih teo wãhni wã jummatdih ñi táí jéihna caá. Yoobópdi Dios ã weñat pínahdih chãjna, “Pablo yeejép chãjni caá”, cãacwã weemdih ï jéih niijcán caá. “Dios ã náahat pah, táinijeh ñi jumúú”, bitadih wã niijíchah, wã táí jummatdih enna, “Pablo yee bohéna caá ã chãjap”, ï jéih niijcán caá. ⁸ Biquína weemdih ï táí wēi enechah, bita ï wēi encah yuhna, biquína ï wēi naáwáchah, bita yeejép ï naáwáchah yuhna, wã joyáh bojna caá. Yoobópdih wã bohénachah yuhna, biquína “Pablo yee bohéni caá”, ï niij naóh yacna caá. ⁹ Nihat cãacwã ï enepboó wã bohénachah, weemdih jéihna yuhna, biquína weemdih enah bojnit, “Oboh jumnijeh caá”, ï niijná caá. Bita weemdih ï mawachah yuhna, wã báadh jwuhna caá. Ĩ mao yohat túutachah yuhna, páantjeh wã jum jwuhna caá. ¹⁰ Biquí láana jĩgahna yuhna, Cristoíh jumna, páantjeh wã wēina caá. Moh yéejni jumna

* 6:5 Hch 16.23

yuhna, bitadih táini doonádih bohéna, queédih bádí jíib jumni wāhat dée pah caá wā bohénap. Biíh pah bóonadih bíbohcan yuhna, Cristoíh jumna, bádí bíbohni dée pah wā wēina caá.

¹¹ Yeéb Corinto tátchidih moondíh bádí oina, úumcan, tíccanjeh, ded pah yeebdíh bádí wā náah yacatdih wā túi naóh daác beedánap be. ¹²⁻¹³ Yeéb wā weh panihnit ñi jumuchah, oinit, yeebdíh wā naóhna caá. Yeebdíh wā oi cádahcan caá. Obohjeéhtih, yeebboó weemdíh ñi oi cádahap jí. Pánihna, yeebdíh bádí wā oyat biíc yoobó weemdíhbat ñi jwúub oyoó.

Jesucristoíh nihcannitdih ã pej jummat tútcat

¹⁴ Yeéb Jesucristoíhwā áihwā nihcannitboodíh ñi pej jumca bojoó. Túi pej jumnit pínah nihcan caá. Nindih ñi túi jenah joyoó: Ded Jesúsdi h jepahni, táinidih ápí chājíhna caá. Obohjeéhtih, Jesúsdi h jepahcanniboó, yeejépdih ápí chājna caá. Pánih jumna, biíc di h í jéih jumcan caá. Yeejép chājni túi chājíhni boodíh ã yéjabipna caá. Túi chājíhni yeejépdih ã jéih yap yohcan níit. Ded Jesúsíh jumna, ã naáwát di h ápí túi jenah joiná caá. Obohjeéhtih, Jesúsíh nihcanniboó nemépwā í maáh ã naáwáchah joinít, ded pah Dios ã jummat di h ã jéihcan caá. Queét chéna t pah í jenah joyát máca h ã jumna caá. Pánih jumna, í jéih míic pej jumcan caá. ¹⁵ Jesucristo Satanásjíh máca h míic í jenah joyát ã jumuchah, í jéih míic pej jumcan caá. Biíc yoobó Jesúsíhwā Satanáíhwājíhbat máca h míic í jenah joyát ã jumuchah, biíc di h í jéih jumcan caá. ¹⁶ Dios páantjeh jumni caá. Jwiít áihwā jumna, caandíhjih wēinit, jwí jepahna caá. Biíh di h wēinit, jepahna,

ãta táican tagaá. Jwiít Jesúíhwã áihwã nihcannitdih pej jumna, ï wēi jepahnidih jwiítbut jwī wēi jepahat dée ã tobohna caá. Pánih jumna, yeéb Jesúíhwã, Jesúíhwã nihcannitdih ñi pej jumca bojoó. Dios báadhni jumna, jwiít Jesúíhwã biíc dih, áih m̄m̄ pánihnit jwī jumna caá.* Jon jãtih ã naáwãtdih naóh yapanit nin pah ït niíj daacáp tajī:

“ Weémboó queétdih táí pej jumna, ï maáh wã jumnipna caá. Queétboó wíihwã jumna, weemdíjhéh ï wēibipna caá’, Dios ã niijná caá”, ït niíj daacáp tajī. (*Lv 26.12; Jer 32.38; Ez 37.27*)

17 Bita naóh yapanitbut nin pah ït jwáub niíj daacáp tajī:

“ Wíihwã nihcannitdih ñi cádaahaá. Queétdih ñi pej jumca bojoó. Íí náah ï chãjat déedih yeéboó ñi chãjca bojoó. Páant ñi cádahachah, weémboó yeebdíh wã wēi enbipna caá. (*Is 52.11*)

18 Pánih wēi ennit, ñi íip wã jumnipna caá. Yeéboó wã weh ñi jumnipna caá’, Chah Wēpni Maáh ã niijná caá”, ït niíj daacáp tajī. (*2S 7.14; 1Cr 17.13; Is 43.6; Jer 31.9*)

7

1 Pánihna, wã oinitá, nindih ñi táí jenah joyoó: “Ñi yéej chãjatdih ñi cádahachah, yeebdíh wēi ennit, wã táí pej jumnipna caá”, Dios ã niijichah joinít, nihat jwī yéejatdih jwī cádah jíih. Dios ã jġgahat pínahdih chãjíchcan, yeejép jwī jenah joyãtdih cádahat caá náahap. Pánih túut n̄m̄m̄nít, táí jenah joiná, ã weñat pínahboodíh jwī chãj jíih.

* 6:16 1Co 3.16; 6.19

Corinto tútchidih moón ï túut nuumát

² Weemdíh ñi jwúub oi jenah joyoó, páant muntih. Ñijeéh jumna, deddih wã yéej chãjcap jĩ. Bohéna, yeebdíh wã yéej chãjat túutcan, yeebdíh wã yee dúuc wáicap jĩ. ³ Páant niijnít, “Pablodih jwĩ táí oicatji jíb jwiít dih peéh chãjat ã jumna caá”, yeebdíh niíj jenah joyát túutcan, “Pablo táí chãjni jĩ”, wã niíj jenah joyát túutna caá. Wã jwíh niijátji pahjeh muntih, wã jwúub niijná caá: Yeebdíh búdí wã oina caá. Pánihna, ded pah yapna, wunna yuhna, biíc yoobó yeebdíh jenah joinít, wã oi cádahcan niít. ⁴ “Queét Corintodih moón táí chãjnit jumna, wã naáwát dih ï táí jepahbipna caá”, niíj jenah joinít, búdí wã wēina caá. Pánihna, yeejép yapna yuhna, yeebdíh páantjeh wã wēi jenah joiná caá.

⁵ Nin Macedonia baácboó wã juyúchah, weemdíh chooát ã wihcap be. Páantjeh yeejép wã yapap be. Dawá jũihnitboó “Ma táí chãjcan caá”, weemdíh ï niíj jũihñup be. “¿Queét Corintodih moón wã oinitboó ï táí jum niít?” niíj jenah joinít, páantjeh yeebdíh búdí wã náhni dahwanap be.*

⁶ Obohjeéhtih, Dios jĩgahat yayániboó weemdíh teo wáacnit, Tito wã pebh ã juyúchah, weemdíh búdí ã weñanap be. ⁷ “Queét ï jwúub táí jumatdih enna, búdí wã weñep be”, weemdíh Tito ã niíj naáwáp be. Páant ã niíj naáwáchah joiná, weembút búdí wã weñep be. “Queét Corintodih moón Jesúíh wã meemdíh búdí ï bidna beé. ‘Yéej chãjnit, Pablodih búdí jwít jĩgahanap taga’, niíj jenah joinít, queébtut búdí ït jĩgahap wut be. Pánih jĩgahnit, ma daác

* 7:5 2Co 2.13

wahnidih ennit, ït túi jepahap tabe”, Tito weemdih ã niij naáwáchah joinít, chah búdí wã weñep be.

⁸ Wã jwíih daácnijidih wah péanit, “Nin wã wêp naóh daacátjidih ennit, búdí ï jġahbipna caá. Páant wã wêp naóh daáccan, ãta túi taga”, niij jenah joinít, búdí wã jġah jwuhap jġ. Obohjeéhtih, buu ñi jġahat yayát doonádih joinít, weembút wã jġahcan caá. ⁹ Buu búdí wã wëina caá. Ñi jġahat doonádih joinít, wëina wã chãjcan caá. Obohjeéhtih, jġahnit, túiniboodih ñi túut nuumát doonádih joinít, búdí wã wëina caá. Dios caá yeebdih át jġahat túutap taga, ñi jenah joyátdih ñi túut nuumát pínah niijná. Pánihna, wã daác wahniboó yéejacan, yeebdih át túi teo wáacap taga. ¹⁰ Dios ã náah yacat pahjeh jwí yéejatdih jġahna, yéej chãjatdih jwí cádahbipna caá. Pánih jġahna, jwí jenah joyátdih túut nuumnít, túiniboodih jwí chãjbipna caá. Páant jwí túut nuumáchah enna, iiguípna jwí bejat déejidih Diosboó ã túi ubbipna caá. Maátcanjeh jwí jġahna yuhna, túi túut nuumnít, búdí jwí wëibipna caá, buca. Obohjeéhtih, bitaboó ï yéej chãjat jíib queétdih Dios ã peéh chãjat pínahdih jġahna yuhna, túut nuúmíhcan, iiguípna ï bejbipna caá. ¹¹ Yeéb Dios ã náah yacat pahjeh jġahnit, ñit túi túut nuumáp taga. ¡Ñi jenah joyoó! Nin pah caá ñi túut nuumát: Buu jwuhna, ded yéej chãjni ã yéejatdih enah bojcanjeh, yoobópdihi ñi túut nuumát túutna caá. Ñi yeejép jenah joyátjidih cádahnit, túut nuumnít, buu ñi túi jenah joyátdih wã jéihyat pínahdih weemdih ñi náah yacna caá. Pánihna, weemdih ñi wëi jenah joi jwúhcatjidih búdí ñit jġahap wut be. Ñi yéejat jíib

Dios ã peéh chãjat pínahdih búdí ùmna, túi túut nuumnít, weemdíh jwúub eníhna, búdí ñit bidip wut be. Dios ã weñat pínahdihjeh ñit chãjap wut be. Det yéej chãjnitdih ñit peéh chãjap wut be. “Buu, queét yoobópdih chãjnit caá. Dedé yéej chãjat peéh queétidih ã wihcan caá, buca”, wã niij jenah joiná caá. ¹² Yeebdíh daác wahna, yéej chãjnidih ñi peéh chãjat pínahdih, ã yéej chãjatjidihbut jenah joicánjeh wã daác wahap jĩ. Obohjeéhtih, Dios yeebdíh enna, “Queét Pablodih yoobópdih oinit caá”, ã niij jenah joyátdih ñi túi jéihyat pínah niijná, wã daác wahap jĩ. ¹³ Páant ñi túut nuumátidih jéihnit, búdí wã wěina caá.

Tito ninboó jwúub juinít, weemdíh nin pah ã niij wěi naáwáp be: “Queét Corintodih moón ĩ túi túut nuumátidih ennit, wã jĩgahatji ã yayáh bejep jĩ. Pánihna, búdí wã wěina caá”, ã niijíp be. Páant ã niijátidih joinít, weembút chah yeebdíh wã wěina caá. ¹⁴ Tito ñi pebhboó ã bejat túut chãjachah, nin pah caandíh wã niijíp jĩ: “Queét Corintodih moón Jesúíhwã nin wã daác wahnidih ennit, ĩ túi jepahbipna caá”, wã niijíp jĩ. Pánihna, ñi túi jepahatjidih jéihnit, Titodih jwúub ennit, wã tíccap be. Titodih wã niijátji biíc yoobó át yapap wut be. ¹⁵ Tito ñi pebhna ã juibínachah, caandíh túi wěi jwááhnit, wã daác wahatidih ñi túi jepahatidih náhninit, yeebdíh chah ã oi jenah joiná caá. ¹⁶ Buu túi jepahnit, Dios ã weñat pínahdihjeh ñi túi chãjatidih jéihna, túttimah biíc yoobó ñi jepahat pínahdihbut wã túi jéihna caá. Pánih jéihnit, búdí wã wěina caá.

Jesúíhwã dinero wahnit, moh yéejnitdih ã teo wáacat

¹ Bũũ wã úudwã panihnitá, biíh naáwát ã jumna caá. Nin Macedonia baácdih jumni tútchinadih moón Jesúíhwã míic wáacnit ded pah ã túi chãjatjidih yeebdíh wã naóhbiþna caá. Dios queétdih oinit, búdí át teo wáacap taga. ² Queét tãbit yeejép yapna yuhna, jwĩ Maáhdih túi jenah joí cádahcan, búdí ã wẽina caá. Pãnih túi jenah joiná, tãbit moh yéejnit jumna yuhna, ãih dinerodih oicanjeh, bita chah moh yéejnitdih búdí ã wãh wáacap jĩ. ³ Weém ennijjeh tigaá yeebdíh wã naáwáp. Queét moh yéejnit yuhna, ã bíbohat pah bóo ã wãhup jĩ. Nihcan caá. Búdí pohba ã wãhup jĩ. ã náahatdih jíib chãjat pínahdiþbut ã wãhup jĩ. Weémboó páant wã wãhat túutcah yuhna, queétjeh jenah joinít, páant bóo búdí weemdíh ã wãhup jĩ. ⁴ “Judea baácdih moón Jesúíhwã moh yéejnitdih búdí teo wáaquíhna, nin pah bóo meemdíh jwĩ wãhndih queétdih ma wãhúú”, weemdíh ã niijíp be.* ⁵ Pãnih wãhna, wã jenah joyát chah ã wãhup be. ãih dinerodih ã wãhat pínah jãtih, “Paá, ded pah ma weñat pínahdiþjeh yoobópdih meemdíh wã chãj wãhbiþna caá”, Diosdih ãt niijíp wut be. Páant ã niiját túttimah, “Dios ã wutuchah joinít, yeéb Jesúíh doonádih bohé jibnitboodíh ded pah ñi náahatdih jwĩ túi teo wáacbiþna caá. Ded pah ñi wutuchah, jwĩ jepahbiþna caá”, jwiítidih ã niijíp be. ⁶ Nit Macedonia baácdih moón ãih dinerodih ã wãhatdih jenah joinít, yeéb Corintodih moondíþbut wã jenah joyóp be. “Ninjĩh moón búdí ã wãhat pah

* 8:4 Ro 15.26

queébtut ï wāhat pínahdih ï ámoh páña naáh”, wā niŷ jenah joyóp be. Páant niŷ jenah joinít, Titodih nin pah wā niŷjíp be: “Meém ïih dinerodih queétdih mat wāh wáac jwíihat túutup wut jī. Pánih jwíihnit, nihat ï wāh wáacni dinerodih ma jwáub ámohat tútat túat niŷná, ï pebhna ma jwáub bej páñaá”, Titodih wā niŷjíp be. ⁷ Yeéb túi chājnit jumna, jwī Maáh Cristodih ñi túi jenah joiná caá. Ā naáwátdih túi jéihnit, ñi túi naóh yapana caá. Caán ã weñat pínahdihjeh búdí chājñhna, yeebdíh jwī bohéat pah túi oinit, bitadih ñi teo wáacna caá. Pánih túi chājnit jumna, ñíih dinerodih oicanjeh, moh yéejnit Jesúhwādh teo wáaquíhna, bíic yoobó yeebdíh túi wāhat caá náahap.

⁸ Páant niŷná, yeebdíh wutna wā chājcan caá. Obohjeéhtih, nit Macedonia baác dih moón ded pah jīgah ennit, moh yéejnitdih búdí ï teo wáacatdih yeebdíh wā naáwáp be, “Jwiítbút búdí jīgah ennit, queétdih chah jwī wahbipna caá”, ñi niŷ jenah joyát pínah niŷná. Páant ñi wāhuchah enna, “Queét Corintodih moón bitadih túi jīgah en teo wáacnit ï jumna caá”, wā jéih niŷbípna caá.

⁹ Jwī Maáh Jesucristo jwiít dih búdí oina, ã teo wáacatdih jwiít dih túi jenah joyát caá náahap. Nin baácboó ã dei jūúwát pínah jātih, Diosjeéh jumna, nihat maáh ã jumuchah, caandíh dedé jedhdat át wihjican tagaá. Obohjeéhtih, nin baácboó dei jūóhnit, ã maáh wēpatdih cádahna, jwiít dih teo wáacat túat niŷná, moh yéejni át jumap wut jī. Pánih teo wáacna, jwiítboó moh yéejnit jumna yuhna, ājeéh jwī jumuchah, jwiít dihbut dedé jedhdat ã wihcan niít. Pánih jīgah ennit, ã teo wáacatdih jenah

joinít, jwiít dihbut biíc yoobó bitadih jġah ennit, teo wáacat caá náahap.

¹⁰ Nin pah wā niġjenah joiná caá: Ñi jwíih jenah joyátji buu biíc jópchi ã yapna caá. Con jópchi, nin Macedonia baácdih moón ĩ jenah joyát pínah jǎtih, yeéb Judea baácdih moón Jesúíhwā moh yéejnitdih jwíih teo wáaquíh jenah joinít ñit jumap wat jġ. Pánih teo wáaquíh jenah joinít, con jópchidih ñi wǎhat pínah dinerodih ñit ámoh jwíhip wat yah jġ. ¹¹ Pánihna, jǎtih táí wēinit ñi teo wáac jwíihat pah, buubut biíc yoobó wēinit, ñi wǎhat pínahdih wǎh péaat caá náahap. Ded bádí dinerodih bíbohni chah ã wǎhu naáh. Obohjeéhtih, ded nump bíbohni bainí ã wǎhu naáh. ¹² Táí biíc yoobó wēinit, ñíih dinerodih oicanjeh, wǎhat caá náahap. Pánih wēi wǎhndih Dios biíc yoobó ã wēi enbipna caá. Obohjeéhtih, bí dée wihcanniboodíh “Dinerodih ma wǎhuú”, Dios ã niijcán caá.

¹³ Judea baácdih moón Jesúíhwādih yeebdíh wǎhat túutna, “Queét Corintodih moón moh yéejnit ĩ jummu naáh”, wā niġjenah joicán caá. Obohjeéhtih, yeéb, queébtut biíc yoobó ñi táí jummat pínah niijná, páant wā wǎhat túutna caá. ¹⁴ Buu yeéb bádí bíbohni jumna, queét bíbohcanitboodíh ñi jéih teo wáacna caá. Biíh láa, yeéb moh yéejnit ñi jumuchah, queétboó bádí bíbohni, yeebdíhbut ĩ jéih teo wáacipna caá. Pánih míic teo wáacnit, nihat Jesúíhwā táí biíc yoobó jwí táí jumcipna caá. ¹⁵ Jon jǎtih Moisés nin pah át niġdaacáp tajġ: “Chah bádí jeémát ojdih júi yacniboó ã ubni yeó jáap ã jeémát pínahdihjeh ã bíbohob be. Bainíjeh ubnibut caán yeó jáap ã jeémát pínahdihjeh ã bíbohob be”, át niġ

daacáp tajĩ.*

Titowã Corintona ã bejat

¹⁶ Yeebdíh wã oi teo wáaquíhat pah muntih, Dios Titodihbut biíc yoobó oi teo wáaquíhat át wãhup taga. Páant ã táí oi teo wáaquíhatdih ennit, “Túina caá, Paá”, wã niijná caá. ¹⁷ “Corinto tãtchidih moondíh jwúub enedih ma bejeé”, wã niijíchah joinít, “Júu, wã bejmi caá”, ã niij wëi jepahap be. Caandíh wã naáwát pínah játih, yeebdíh búdí teo wáaquíhna, caanjéh ñi pebhna tub bejihni ã jumup be.

¹⁸ Caandíh pej jumni pínah biíh Jesúsdi h jéihnidihbut ñi pebhna wã bejat tãttna caá. ã pej jumni pínahdih ni hat nin Macedonia baác di h jumni tãtchinadi h moón Jesúíhwã búdí ã wëi naóhna caá. “Caánboó Jesúíh dooná di h táí bohéni caá”, ã niij wëi naóhna caá. ¹⁹ Páni h wëi naóhni t, Judea baácboó wã bejehah, weemdi h pej jum bejni pínahdihbut caandíh ã ñi wip be. Ni hat yeé b Jesúíhwã ñi wãh wáacni dinerodi h jwĩ jubí wãhachah enna, “Queét bií h baác di h moón Jesúíhwã jwiít di h oini t, dinerodi h ã wahachah, búdí ma teo wáacna caá, Paá”, Dios di h ã niij wëi naóhbi pna caá. ²⁰ Ñi wãhni dinerodi h jwĩ táí en daobípna caá. “Pablowã jwí h dinerodi h yee dúuc wáina caá ãt chãjap taga”, ñi niij jenah joicát pínah niijná, caán ni hat táí wëi enni di h Titojeé h wã wahna caá. ²¹ Páni hna, jwĩ Maáh ã enechah, bitabut ã enechah, yoobó p di h táí chãjáhna, bií h di hbut Titojeé h wã wahna caá.*

²² Titowã ñi pebhna ã bejehah, bií h di hbut ã jeé h wã wahna caá. Caanbút jwĩ Maáh di h jepahni, táí

* 8:15 Ex 16.18 * 8:21 Pr 3.4

teo wāhni caá. Dawá láa bitadih túi oinit, ā teo wáacachah, wā enep be. Yeebdíh túi jenah joinít, “Queét Corintodih moón Jesúíhwā ĩih dinerodih ĩ túi wūh wáacipna caá”, wā niíj wēi naáwáchah joinít, caanbút yeebdíh teo wáacadih búdí ā bejíhna caá. ²³ Nit caá ĩi pebhna wā wahnit: Titodih ĩi túi jéihna caá. Caán wā chéen caá. Jesúíhwā dih wā teo wáacachah, caán wājeéh teoni caá. Bita chénewāboó ĩi pebhna ājeéh bejnitdih ĩi túi jéih jwuhcan caá. Queét chénat pah jwī Maáhdih túi teo wāhna, caandíh túi weñanit caá. Páant ĩ jumuchah enna, Jesúíhwā queédih ĩ ĩío wahap be. ²⁴ Pánihna, ĩi pebhna ĩ juibínachah, queédih ĩi túi oi pej jumú. Páant ĩi oi pej jumuchah enna, ĩi oyatdih wā naáwátji biíc yoobó ā jumatdih bita Jesúíhwā ĩ jéihbipna caá.

9

¹ Judea baácdih moón Jesúíhwā moh yéejnitdih teo wáacat túut niijná, dinerodih wahat pínahdih yeéb jǎtih ĩitát jéih tagaá. Pánih jéihnit ĩi jumuchah, bainíjeh wā jwúb naóh daác wahna caá. ² Yeéb bitadih búdí ĩi teo wáaquíhatdih jéihnit, nihat Macedonia baácdih moón Jesúíhwā dih búdí niíj wēi naóhna beé wā chājap be. “Queét Acaya baácdih Corinto tútchidih moón Jesúíhwāboó con jópchi Judea baácdih moondíh búdí teo wáaquíhat ĩ jenah joí jwíhip jī”, wā niijíp be. Páant wā wēi naáwáchah joinít, queébtut Jesúíhwā moh yéejnitdih búdí teo wáaquíhat ĩ jenah joiná caá. ³ Dinerodih ĩi ámohochah, ĩ teo wáacat pínah niijná, nit biíc peihcannit jwī údwā panihnitdih buu ĩi pebhna wā wahna caá. Páant ĩ teo wáacachah, weémboó

ñi pebhna wã jubínachah, ñi wũh wáac pãini dinerodih ennit, yeebdíh wã naáwátji biíc yoobó ã jumatdih nihát ï jéihbipna caá. ⁴ Biquína nin Macedonia baácdih moón wãjeéh ñi pebhna ï jubínachah, ñi wũhat pínah dinerodih ñi bíboh pãicah, wã naáwátji biíc yoobó ñi chãjcatdih enna, búdí wãta tíic tagaá. Yeebbát búdí ñita tíic tagaá. ⁵ Yeebdíh ï teo wáacat pínah niijná, Titowãdih ñi pebhna wã bej páñat túutna caá. “Moh yéejnitdih jwĩ teo wáacat túut niijná, nin pah bóo jwĩ wũh wáacbipna caá”, ñi niijníji dinerodih ñi túi bíboh páñat pínah niijná, ï jéih teo wáacbipna caá. Páant ñi wũh wáac páñachah, ñi pebhna wã jubínachah, yeebdíh jwũub wũhat túutat ã wihcan níit. Pánihna, ñi wēi wũhat pínahdih ñi túi bíboh páñáá.

Búdí wũhat caá náahap

⁶ Nindih ñi túi náhninaá: Ded daocánnibitjeh ã momochah, daocánnijeh ã ubbipna caá. Obo-hjeéhtih, dawá momniboó dawá ã ubbipna caá. Páant ã chãjat dée pah, moh yéejnitdih teo wáacna, jwũih dinerodih oinit, bainíjeh jwĩ wũhuchah, Diosboó jwiútdih bainíjeh ã wũhbipna caá. Obo-hjeéhtih, túi wēinit, búdí jwĩ wũhuchah, Dios jwiútdihbat chah búdí ã wũhbipna caá. ⁷ Yeéb ñíih dinerodih ñi wũh wáacachah, túi jenah joí, “Nin pah bóo caá weemdíh jwĩ Maáh ã wũhat túuturp”, níj jenah joinít, ñíih dinerodih oicanjeh, wēi wũhat caá náahap. “Bita weemdíh ï wũhat túutuchah, páant bóojeh caá wã wũhurp”, niijcánjeh wũhat caá náahap. Bita ï niiját pínahdih jenah joicánjeh wũhat caá náahap. Páant, ñi túi wēi wũhuchah, Diosboó

yeebdíh ã wēi enbipna caá.* ⁸ Ñi náahat chah Dios yeebdíh ã wāh̄bipna caá, ñi bíboh̄atj̄ih bitadih ñi túi teo wáacat pínah niijná. Páant ã wāh̄chah, chah dawádih ñi jéih teo wáac̄bipna caá. ⁹ Jon jātih David nin pah āt niij daacáp tajī:

“Ded táiniboó moh yéejnitdih ã túi wēi wāh̄na caá. Páant ã wāh̄chah, Dios caandíh ã jwáub wāh̄bipna caá, páantjeh bitadih ã jwáub túi teo wáacat pínah niijná”, āt niij daacáp tajī.
(*Sal 112.9*)

¹⁰⁻¹¹ Dios jwī momat pínah, jwī jeémát pínahdihbut wāh̄ni,* bitadih ñi wāhat pínahdihbut yeebdíh búdí ã wāh̄bipna caá. Páant ã wāh̄chah, bitadih chah ñi jéih teo wáac̄bipna caá. Dios yeebdíh chah ã wāh̄chah, yeéboó túi wēinit, queét Judea baác̄dih moón moh yéejnitdih ñi wāh̄nidih jwiít̄dih ñi wāh̄ yapaat táutna caá. Páant ñi wēi wāh̄chah enna, queét nihat Diosdih wēinit, “Queét jwiít̄dih ī teo wáacat táina caá, Paá”, ī niij wēi naóhbipna caá. ¹² Túi wēi wāh̄nit, Jesúihwādih búdí ñi teo wáacna caá. Páant ñi teo wáacachah, dawá Diosdih búdí ī wēi naóhbipna caá. ¹³ Páant ñi túi wēi wāh̄chah enna, yeéb Jesúihwā ñi jum̄atdih nihat cāacwā ī jéihbipna caá. Bit̄a Jesúihwā ñi túi chājatj̄idih ennit, “Paá, queétboó Jesúih táini doonádih naóh̄nitjeh nihcan, túi jepah̄nit caá. Pānih jum̄na, jwiít̄dih, bit̄a míhwādihbut teo wáacat táut niijná, jwiít̄dih túi wēinit īih dinerodih īt wahap taga. Páant ī jum̄atdih meemdíh búdí jwī wēina caá”, ī niij wēi naóhbipna caá. ¹⁴ Queét Judea baác̄dih moón yeebdíh jenah joinít, búdí oina, nin pah ī niij wēi

* **9:7** Lc 6.38 * **9:10-11** Is 55.10

naóhbpna caá: “Paá, queédih búdí oinit, ma túi teo wáacachah, queét jwah jwiít dihbat búdí oinit, ĩ túi teo wáacap be. Pánihna, jwiít nihatdih búdí oinit, ma teo wáacatdih túina caá”, ĩ niijbípna caá. ¹⁵ Dios búdí oinit, teo wáacat túut niijná, jwiít dih wun wūhnit, ā túi ubat pínah niijná, ā wūh Jesús dih āt wah deyajip taga. Pánih wahna, chah túini ā chājatjidih jenah joinít, “Búdí ma teo wáacatdih túina caá, Paá”, caandih jwī wēi niij jīh.

10

Pablo Jesús ā naáwát túutni ā jamat

¹ Būu nindih ñi náhninaá. Weém, Pablo, yeebdih jwíh bohénijeh tigaá. Obohjeéhtih, yeéb weemdih nin pah ñi niij yeena caá: “Pablo ninboó jwíjeéh jamna, cāacwādh úmna, jéih naóhcanni pah ā jamna caá. Obohjeéhtih, biáboó jamna, úmcanjeh jwiít dih jūih naóh daác wahni caá”, ñit niij yeenap wut be. Cristo cāacwādh oinit, teo wáaquíhna, íjcan túinijeh naóhni āt jamap wut jī. Páant túinijeh ā naáwátji pah muntih weembát íjcan túinijeh yeebdih wā naóh daác wahna caá. ² Pánih íjcan túinijeh naáwíhna yuhna, yee naóhntdih wā wēp naóhna caá. Ñi pebhna wā jūibínachah, ñi túi chāja chaáh, páant bóojeh, ñi yeeatdih ñi cádaahá, “Pablo jwiít dih jūihná”, niijná. Ñi cātíh jamnit, weemdih nin pah ĩ niij yeena caá: “Diosdih jepahcannit ĩ jenah joyát biíc yoobó Pablobat ā jenah joiná caá. Pánih jenah joí bohéna, Cristodih weñáihcan, ā weñat pínahdijeh ā bidna caá. Pánihna, Cristo ā naáwát túutni nihcan caá”, queét ĩt niij yeenap wut be. Páant niijnít dih búdí wā jūihbpna caá.

³ Diosdih jepahcannit míic naóhna, queét ì jengah joyátjìhjih chah ìpì niijná caá. Obohjeéhtih, weembát cãacjeh jumna yuhna, queét ì chãjat pah weémboó wã chãjcan caá. Weemdíh yeejép naóhndih Dios ã wēpatjìh caá chah wãpì niijíp. ⁴ Pánihna, Diosdih yap yohndih weém táí yoobópdih wã wēp naóhna caá, ì yap yohatdih ì cádahat pínah niijná. Pánih wēp naóhna yuhna, wã jengah joyátjìhjih wã jéih cádahat túutcan caá. Obohjeéhtih, Dios ã wēpatjìh ì yap yohatdih wãpì cádahat túutna caá. Caandíh yap yohndih, ì jengah joyát yeejép ã jummatdih Dios ã wēpatjìh niihat cãacwãdih wã jéihyana caá, yeejép ì jengah jói cádahat pínah niijná. ⁵ “Nin pah caá Dios ã jummat”, niij yee naóhndih ã wēpatjìh wã cádahat túutna caá. Cãacwã Diosdih ì jéihyat déedih jãhat panidih ã wēpatjìhjih wã jéih yohna caá. “Maá Jesús, weemdíh ma táí teo wáacá, meemdíh yap yohcanjeh, yeejép wã jwúb jengah joicát pínah niijná”, jwiít nihatdih niiját caá náahap.* ⁶ Ñi pebhna wã juibínachah, yeejép jengah joicánjeh, caandíh ñi táí jepahatdih enna, det jwí Maáhdih yap yohna, páantjeh yeejép jengah joinítboodíh búdí wã peéh chãjbipna caá.

⁷ Yeéb wíih bácahdihjih ñi jéihna caá. Obohjeéhtih, wã jengah joyátboodíh ñi jéihcan caá. “Weem caá Cristo ã naáwát dih naóh yapaat túutni”, ded niijnídih nin pahbut niij jengah joyát caá náahap: “Pablobut bíic yoobó ã naáwát dih naóh yapaat túutni caá”, ã niij jengah joyó naáh. ⁸ Obohjeéhtih, yeéb nin pah ñi niijná caá: “Pablo

* **10:5** Ef 6.11-17

nin pah ã niijná caá: ‘Corintodih moondíh Dios weemdíh bohénadih ã bejat túutap be’, niijnít, jwiít dih maáh dée ã jumna caá”, ñit niijíp wut yah be. Obohjeéhtih, ã bohéat túutni jumna, wã tíccan caá. Dios beé ñi pebhna weemdíh ã bejat túutap be, ãih táini dooná dih naóhna, yeebdíh wã teo wáacat pínah niijná. Páant ã naáwát túutni jumna, yeebdíh yéejáihcan, ñi tái jummat pínah niijná, ãih wēpatjīh yeebdíh wã bohénap jī. ⁹ Páni hna, wēp naóh daác wahna yahna, yeebdíh úumaíhcan, ñi tái túut nuumát pínah niijná, yeebdíh wã daác wahap be. ¹⁰ Biquína ñijeéh jumnit nin pah ít niijíp wut yah be: “Pablo naóh daác wahna, úum náah jumni maáh dée pah tab wēpép ã wutna caá. Obohjeéhtih, ninboó jǎóhna, oboh jumnijeh ã jumna caá. Páni hna, ã bohéni doonábut oboh naáwátjeh caá”, ít niijíp wut be. ¹¹ Páant ĩ niijíchah yahna, ĩ niiját pah wã nihcan caá. Wã wēp naóh daác wahat pahjeh muntih, ñi pebhna juibínit, ñi tái túut nuumát pínah niijná, biíc yoobó wēp naóhni wã jambipna caá.

¹² Biquína ñijeéh jumnit, tái jéihcan yahna, “Bita ĩ jéihyat chah jwiítboó jéihnit caá. Bita Diosdih ĩ teo wāhat chah teo wāhniit jwī jumna caá”, ít niij mīic weñep wut yah be. Obohjeéhtih, páant niij wēina yahna, tái jenah joicánnit, Diosdih tái teo wāhniit nihcan caá. Queét ĩ jenah joyát pah weémboó wã jenah joicán caá. ¹³⁻¹⁴ Weém cāacwā ĩ maáh nihcan caá. Obohjeéhtih, jwī Maáh Jesu-cristo ã wutatdih jepahnit, caandíh teo wāhniijeh caá. Yeebdíh bohénadih ã jib bejat túutuchah, wã jepahap jī. Wã jenah joyátjeh nihcan, Diosboó

weemdíh ã wahachah, yap yohcanjeh, ã wʉtatdih wã jepahap jĩ. Páant ã wʉtatdih jepahnit, Jesúih táini doonádih yeebdíh jwíih bohéni wã jamap jĩ. Pánih jwíih bohéni jamna, weemdíh wēp naáwát caá náahap. Ded pah wã bohéat pínahdih jwĩ Maáh weemdíh ã naáwáchahjeh joinít, wãpĩ bohéna caá. Wã jenah joyát dihjeh wã bohécan caá. ¹⁵ Yeebdíh yee bohénitji ĩ wēi niiját pah, weémboó wã wēi niijcán caá. Bitá ĩ bohénitjidih ennit “Queédih weémboó wã tái bohénachah, Cristodih ĩt jepahap taga”, wã niij wēican caá. Wã tewatdihjeh wã wēi naóhna caá. Yeebdíh jwíih bohéni jamna, Cristodih chah ñi jenah joyát pínahdih wã náah yacna caá. Pánih náah yacna, ñi pebhna jwʉub bohénadih wã bejihna caá. ¹⁶ Pánih bohénit, jwĩ Maáh ã weñat pínahdih ñi tái chājachah ennit, biíh tətchinadih moondíhbut bohénadih wã bejbipna caá. Pánihna, ñíih baác yehboó benit, bita bohé jwʉhcannitboodíh wã naóhbipna caá. Jesúih doonádih joi jwʉhcannitdihjeh naóhna, bita ĩ bohénitjidih “Wã tái bohéatji jíib queét jwĩ Maáhdih ĩ tái péena caá”, wã niijcán niít. ¹⁷ Páant niijnít, jon jǎtih Dios naáwát dih naóh yapani nin pah át niij daacáp tajĩ: “ ‘Weemdíh dedé jədhdát wihcan caá’, ĩ niijcá bojo naáh. Obohjeéhtih, ‘Jwĩ Maáh Dios, nihat jéihni, weemdíh ã tái teo wáacáp be’, ĩ niijí naáh”, át niij daacáp tajĩ.* ¹⁸ Det queétjeh “Jwiít caá tái bohénit”, niij jenah joinít dih Dios ã wēi encan caá. Obohjeéhtih, “Caán caá tái bohéni”, jwĩ Maáh Cristo ã niijníboodíh Dios ã tái wēi enna caá.

* **10:17** Jer 9.24

11

Yeenit ï bohéat ã tobohat

¹ Ded ã túi chãjatjidih bitadilh ã wëi naáwáchah, ãpï túican caá. Páant naáwát ã túicah yuhna, ded pah wã chãjatdih bita yeebdíh ï yeeatdih wã naóh yoobábipna caá. ² Weém jïí Jesúih túini doonádih yeebdíh wã jwíih bohénap jï. Dios yeebdíh búdí ã oyat biíc yoobó weembút yeebdíh wã oina caá. Pánih oinit, Cristodih jepah cádahcan, ãjeéh biíc dih ñi jummatdih yeebdíh búdí wã náah yacna caá. ³ Obohjeéhtih, bita yeejép ï bohéatdih yeéb ñi joyát pínahdih búdí wã úum yacna caá. Jon jãtíh mai pah jígonhi Satanás Evadilh búdí ãt yee naáwáp wut jï. Páant ã yee naáwát dih jepahnit, Eva Dios biíc dih mi jummatdih mit cádahap wut jï. Páant ã yeeatdih mi jepahatji dée pah muntih, bitaboó ï yee bohéatdih yeebút jepahnit, Cristodih ñi cádahíhatdih búdí wã úum yacna caá.* ⁴ Det wã bohéatji pah bohécan, “Jesús nin pah jumni caá”, níj yee bohénadilh ñi pebhboó ï jwibínachah, ñit wëi jwãáhji tagaá. Yeebdíh wã bohéatji biíc yoobó ï bohécah yuhna, ¿dépanihna jenah joicánjeh, queétdih ñi jepah? “Nin pah caá Túini Espíritu ã chãjap”, ï níj yee bohénachah, ñit joijí tagaá. Caandíh wã naáwátji biíc yoobó ï naóhcah yuhna, ¿Dépanihna queét yee bohénitboodíh yeéb ñi jepah? Jesúih túini doonádih wã naáwát túttimah, ¿Dépanihna yeéb yee naóhnitboodíh ñi túi joí? Páant ñi chãjachah enna, Cristodih ñi pée cádahat pínahdih wã úum yacna caá. ⁵ Queét yee bohénit “Jwiítboó Dios ã bohéat túutnit bita ã wahnit chah jéihnit jwí

* **11:3** Gn 3.1-5; 13

ɟumna caá”, i niijichah yuhna, “Weém Dios ã bohéat tútni wã ɟumchah, weemdih chah jéhnit nihcan caá”, wã niij jenah joiná caá. ⁶ Túi wéheni nihcan yuhna, Dios naáwátdih túi beh joiní caá wã ɟumɟp. ã naáwátdih wã bohénachah joinít, páant wã ɟumatdih yeéb ñi túi jéihna caá.

⁷ Nindih ñi túi jenah joyoó: Yeebdih Jesúih táini doonádih bohéna, wãpĩ jíib úbhcap jĩ. Páant wã bohéat jíib úbhcanjeh, moh yéejni dée wã ɟumɟp jĩ. Pánih ɟumna yuhna, yeéboó moh yéejcanjeh, ñi túi ɟumat pínah niijná, yeebdih wã túi teo wáacap jĩ. Pánih teo wáacna, ¿yeebdih wã túi chãjcanit beé? ¿Weembát yeebdih jíib wã niij jíih, queét bita bohénitdih ñi wéi enat pah, weemdihbut ñi jwúb wéi enat pínah niijná? ⁸ Obohjeéhtih, yeebdih wã bohénachah, biih tátchinadih moón dawá Jesúihwã ñijeéh wã ɟumat pínah niijná, ñih dinerodih weemdih i wühɟp jĩ. Yeebdih teo wáacat túut niijná, i wühni dinerodih nuumát dée wã chãjap be. ⁹ Ñijeéh ɟumna, bií dée bíbohcan yuhna, yeebdih dinerodih wãpĩ úbhcap jĩ. Jwĩ údwã panihnit Macedonia baácdih moón Jesúihwã ñi pebh wã ɟumchah, nihat wã náahatdih i úb ɟuibínap jĩ. Páant i úb ɟuibínachah, yeebdih dinerodih wã úbh tac buugácap jĩ. Túttimahbut, yeebdih wã úbh tac buugácan níit.* ¹⁰ Cristo yoobópdih ã naáwát pah, weembát áih ɟumna, yoobópdih nindih wã naóhna caá: Jesúih táini doonádih jíib wihcanjeh yeebdih wã bohéatdih búdí wã wéi naóhna caá. Biíc yoobó jíib wihcanjeh wã bohéat pínahdihbut nihat ñíih baácdih moondih

* **11:9** Fil 4.15-18

jéihnit, páant wã wëi naáwátidih joinít, “Caán dée ãpĩ chãjcan caá”, ï niijcán niít. ¹¹ Yeebdíh dinerodih wã wãbhcatjidih jenah joinít, ¿ded pah tigaá ñita niij jenah joí? “Pablo jwiítidih jíib wãbhcan, jwiítidih ã oican niít”, ¿ñi niij jenah joí niít? Nihcan caá. Yeebdíh búdí wã oina caá. Páant wã oyatdih Dios ã jéihna caá. ¹² Jíib wihcanjeh páantjeh yeebdíh wã bohébična caá, queét yee bohénitboó “Pablo ded pah yeebdíh ã bohéat biíc yoobó caá jwiítbut jwĩpĩ bohéna caá”, ï yee niijíchah joinít, queétdih ñi joyáh bojat pínah niijná. Queét yee bohénit ï bohéatji jíib yeebdíh ïpĩ wãbhcan caá. Obohjeéhtih, weémboó wãpĩ jíib wãbhcan caá. Pánihatdih túi jenah joinít, mácah jwĩ jumatdih ñi túi jéihbična caá.

¹³ Pánih chãjnit yoobópdiħ Jesús ã bohéat túutnit nihcan, queét yeenitjeh caá. “Jwiít caá Jesús ã bohéat túutnit”, niij naóhna yuhna, ã wahnit nihcan caá. Páant niijná, wã jumat dée pah ï jumíhip yuh caá. ¹⁴ Pánihna, yeenit jumna, páant ï chãjat pínahdih wãát jéihyep be. Yeejép wã ï maáh Satanásbut biíc yoobó ãpĩ chãjna caá. Dawá láa caanbát yeena, túini ángel, Dios ã wahnit pah ã míic jíghana caá. ¹⁵ Satanás ã chãjatdih jéihna, caandíh teo wãhnitbut “Jesús ã wahnit caá”, niij yeenit, Diosdih teo wãhnit pah ï jumíhatdih wãát jéihyep be. Túi chãjcanit jumna yuhna, túi chãjnit dée pah ï jumíhna caá. Pánihna, Diosboó niħat ï yeeatji jíib queétdih búdí ã peéh chãjbična caá.

Pablo yeejép ã yapatji

¹⁶ Bũũ jwuhna, ded pah wã jumatjidih wã wëi naóhbična caá. “Pablo ã túi chãjatjidih tub wëi naóhniabeh caá”, weemdíh ñi niij jenah joicáh, ã

túimi nacaá. Obohjeéhtih, weemdíh páant niij jengah joiná yuhna, ded pah wã yapatjidih wã wëi naáwáchah, bainíbit ñi joi jwúhúú. ¹⁷ Yeebdíh pánih naóhna, jwí Maáh Jesús weemdíh “Ma yapatjidih ma naáwá queétdih”, ã niijcáh yuhna, ded pah wã yapatdih wã naóhbiipna caá. ¹⁸ Dawá bitaboó ded pah í túi chãjatjidih wëi naóhna, weembút ded pah wã yapatjidih wã wëi naóhbiipna caá. ¹⁹ Yeebboó “Chah túi jéihnit jwí jumna caá”, ñi niij jengah joiná yuh caá. Obohjeéhtih, yee naóhnitboó í naáwáchah yuhna, ñi túi wëi joiná caá. ²⁰ Queét ñi maáta dée, yeebdíh búdi í wutuchah, ñi túi wëi joiná caá. Dawá láa ñíh dinerodih í yee dúuc wáina caá. “Jwiít niihat jéihnit jwí jumachah, jwiít dih ñi túi weñeé”, ípí niijná yuh caá. Biíh láa yeebdíh íjnit, í mao tícana caá. Páant yeejép yeebdíh í chãjachah yuhna, ¿Dépanihna páantjeh queétdih ñi túi jepah? ²¹ Ñijeéh jumna, “cãacwãdih úumni”, ñi niijni, queét í chãjat pah weémboó wã chãjcap be. Páant wã chãjat pínahdih wã úumatjidih naóhna, wã tícana caá. Queét í chãjat pah chãjcan yuhna, Jesús ã wahni wã jumatdih ñi túi jéihyat pínah niijná, weembút ded pah wã yapatjidih wã wëi naóhbiipna caá.

²² Queétboó bita chah jéihnit jumíhna, “Jwiít judíowã jwí jumachah, jwiít dih ñi weñeé”, yeebdíh ípí niijíp wut be. Obohjeéhtih, weembút judío mun tigaá. Queétboó “Jwiít Israel ã jaimená, Dios ã ñíonitji jwí jumna caá”, yeebdíh ípí niijíp wut be. Obohjeéhtih, weembút Israel ã jaima mun tigaá. Queétboó “Jwiít Abraham ã jaimená, ‘Yeebdíh wã túi chãj wãhbiipna caá’, Dios ã ni-

ijnítji caá”, yeebdíh ìpĩ niijíp wut be. Obohjeéhtih, weembút Abraham ã jũima mun tigaá. ²³ Queétboó “Cristodih teo wũhni jwĩ jamna caá”, yeebdíh ìpĩ niijíp wut be. Páant ì niijíchah joinít, nin pah yeebdíh wã niijná caá: “Weembút Cristodih teo wũhni mun tigaá. Weém caá bácah queét ì tewat chah búdí teoni”, yeebdíh wã niij naóhna caá. Páant niij naóhna, páantjeh jenah joicánnit ì wéheat pah naóhna yuhna, wã tíccan caá. Queét ì teo wũhat chah Cristodih wãpĩ teo wũhup be. Jesúih túini doonádih wã bohéátji peéh dawá láa nemat mũáboó weemdíh ì nemep jĩ. Dawá láa weemdíh ì puñup jĩ. Dawá láa cáacwã weemdíh ì mao yohíhip jĩ. Páant ì mao yohíhichah, weém yeejép wãpĩ yapap jĩ.* ²⁴ Cinco láa jwiít judíowã jwĩ maáta weemdíh ìt tewat túutup tajĩ. Weemdíh ì tewat jamat pah, tabit yéej chãjnitdih momo jiwí chóo coóh jamni tōpnajĩh ì puñat biíc yoobó treinta y nueve láa weemdíh ì puñup jĩ.* ²⁵ Biíc peihcanni láa Romanowã weemdíh teonit, máa doóbhajĩh ì puñup jĩ.* Biíc láa weemdíh mawíhna, jeejĩh ì yohop jĩ.* Biíc peihcanni láa búdí jãáj chóojĩh jib bejna, jwĩ daabáp jĩ. Biíc láa daabnit, máa naadíh teonit, búdí muj tacdíh pah daa jãóh, caán yeó jáap pah tãah bej, jwũub pah túo bejat dée wã jamuchah, ì ubup jĩ. Pánihna, caán láa, wã waníhip jĩ. ²⁶ Dawá láa Jesúih túini doonádih bohénit, yuúp wã jib bejep jĩ. Pánih bohé jibnit, búdí yeejép wã yapap jĩ. Biíh láa tobohni mũjnadíh wã bejep jĩ. Biíh láa namáboó jib bejchah, bií déedih chewe

* 11:23 Hch 16.23

* 11:24 Dt 25.3

* 11:25 Hch 16.22

* 11:25 Hch 14.19

mao dúuc wáyat dée ã tobohóp jĩ. Biíh láa wã déewãjeh weemdíh ĩ yéejáhip jĩ.* Biíh láa judíowã nihcannitbut weemdíh ĩ mawíhip jĩ.* Tútchinaboó, tútchi wihcapboó, búdí mǎjboobút wã jumǎchah, wǎnat dée ã tobohóp jĩ. Biíh láa “Jwiít Jesúíhwã caá”, niíj yeenit, ĩ mawat dée ã tobohóp jĩ.²⁷ Jesúíh túini doonádih bohéna, búdí wǎpĩ tewep jĩ. Pánih teona, dawá láa ñocanjeh wã bohé daa jǎúwǎp jĩ. Dawá láa jeémát wihcah, nǎugúp tǎbǎchah, tǎbit taca jootóchah, búdí yeejép wã yapap jĩ. Dawá láa dúwát pínah yéguehbut wihcah, búdí cǎbǎhǎchah, yeejép wǎpĩ yapap jĩ.

²⁸ Pánih yeejép yapna, páant bóojeh át nihcap jĩ. Yeó jáap jumát pah nihat Jesúíhwã “caandíh cádahná”, niijná, búdí wǎpĩ náhni dahwana caá.²⁹ Biíc Jesúíh ã tǎbǎp chǎúúchah, weembút tǎbǎp chǎúhni pah wã jumna caá. Bitá Jesúíhdih ĩ yéej chǎjat tǎtǎchah enna, queét yeejépwǎbóodih búdí wã íjna caá. Pánihna, yeéb nihat Jesúíhwã, wã weh dée ñi jumǎchah, yeebdíh úum yacna, yeejép wǎpĩ yapna caá.

³⁰ Páant yeejép wã yapatjidih wěi naóhna, ded pah wã túi chǎjatdih yeebdíh wã wěi naóhcan níit. Obohjeéhtih, wã wěpcatjidih yeebdíh wã wěi naóhbipna caá.³¹ Páant wã naáwáchah joinít, “Yoobópdih caá páant ã niiját”, Dios ã niíj jéihna caá. Caán caá jwĩ Maáh Jesucristo íip. Pánihna, yeó jáap jumát pah “Paá, meemjéh nihat jéihni, chah wěpni caá”, túi wěi niiját caá náahap.³² Weém Jesucristodih wã jwíh jepahat túttimahbitjeh, Damasco tútchiboó wã jumǎchah, caán tútchidih moón

* 11:26 Hch 9.23 * 11:26 Hch 14.5

ĩ maáh, Aretas nump jumni, weemdih át tewat túutap wut jĩ. Pánihna, nihat Damasco tútchi wáihyat júdu jěcnadih áih soldadowādih át páñat túut wut jĩ, wā bac bejehah ĩ tewat pínah niijná. ³³ Páant ĩ páñachah enna, wā chéenwā búdí wuhdih weemdih waadát túutnit, wáihyat júduh jih jumni muá enat jěcmant ĩ cádah deyanap jĩ. Pánih cádah deyanit, ĩ teo wáacachah, moh yéejni wā jweyép jĩ.*

12

Pablo oo júmat dée ā enat

¹ Buu weemdih ded pah biih ā yapatjidih wā jwúub naóhbipna caá. Queét yee bohénitboó “Jwiítjeh caá oo júmat dée jíghatdih enna, chah jéihnit jwĩ jumap”, ĩ niij naóhna yah caá. Obohjeéhtih, jwĩ Maáh weemdihbat oo máh enat dée pah ā jíghop jĩ. Páant ā jíghatjidih yeebdih wā naóhbipna caá. Ded pah weemdih ā jéihyaatdihbat wā naóhbipna caá. ²⁻³ Catorce jópchi jātih Dios weemdih japboó ā ub púuh laab béjep jĩ. Ded pah ā ub púuh laab béjatjidih wā jéihcan caá. Wíih bácahdih, wíih caolihdihjeh ā ub bej déeji oo júmat pah enatjidih, wā jéihcan caá. Diosjeh caá ā jéihyep. ⁴ Á pehbhoó, Paraíso wūt jumapna juibínit, ā naáwáchah wā joyóp jĩ. Jwiít cáacwājeh jwĩ jéih naóh buujácat déedih wā joyóp jĩ. Páant caandih wā joyóchah yahna, weemdih ā jwúub naóh yapaat túutcap jĩ. ⁵⁻⁶ Páant weemdih ded pah ā yapatdih wēi naáwíhna yahna, weemjéh ded pah wā jumatdih wā wēi naóhcan niit. Obohjeéhtih,

* **11:33** Hch 9.23-25

yoobópdiĥ ã ĵumachah, wã ĵwub naáwáchah ni-hna, áta túi taga. “Pablo túini oo ĵumat dée pah enna, Jesús ã wahni nacaá”, ñi niĵ weñatdiĥ yeebdíĥ wã náah yaccan caá. Obohjeéhtih, ded pah wã chãjatjidiĥ, ded pah wã bohéátjidiĥbut jenah joinít, “Pablo ĵwí Maáh ã bohé jibat túutni caá”, ñi niĵ jéihyatdiĥ wã náah yacna caá. Weemjéh wēpcanni wã ĵumatdiĥ ñi jéihyat pínah niĵná, buu ded pah biíĥ wã yapatjidiĥbut yeebdíĥ wã naóhbiĥna caá. ⁷ Chah túini oo ĵumat déediĥ enna, “Weém caá bácaĥ chah jéihni”, wã niĵ jenah joyát weemdíĥ ã tobohna caá. Páant ã tobohah pínahdiĥ jéihna, Dios Satanásdiĥ weemdíĥ yeejép át yapat túutup taga, “Weemjéh wēpcanni caá”, wã niĵ jenah joyát pínah niĵná. ⁸ Pániĥ ĵumna, biíc peihcanni láa ĵwí Maáh Jesúsdiĥ caán yeejép yapatdiĥ ã yohah pínahdiĥ wã wubup yuh be. ⁹ Obohjeéhtih, weemdíĥ nin pah ã niĵ jepahap be: **“Caandíĥ wã yohcan niit. Obohjeéhtih, caandíĥ yohcan yuhna, meemdíĥ búdí oinit, wã túi teo wáacbiĥna caá. Pániĥ wēpcannijeh ĵumna, wã oi teo wáacat pínahdiĥ chah ma bidbiĥna caá. Pániĥna, meemdíĥ búdí wã teo wáacachah ennit, wã wēpatboodíĥ niĥat cãacwã ĩ jéihbiĥna caá”**, Jesús weemdíĥ ã niĵ jepahap be. Páant ã niĵíchah joinít, wã wēpcatdiĥ wã wēi naóhbiĥna caá, ã wēpatjīĥ weemdíĥ búdí ã teo wáacat pínah niĵná. ¹⁰ Páant tigaá Jesúsĥ wã ĵumat jīb yeejép yapna, búdí wã wēina caá. Bitá weemdíĥ yeejép ĩ wéhenachah, yeejép ĩ chãjachah, ĩ jĵaghanachah, dedé biíĥ weemdíĥ yeejép ã yapachah yuhna, wãpĩ túi ĵumna caá. Pániĥ wēpcanni wã ĵumachah, Jesús ã wēpatdiĥ chah búdí bidnit,

“Weém jéihcanni wã jumna yuhna, ã teo wáacatjĩh wã túi buujábipna caá”, wã níj jéihna caá.

Corinto tútchidih moondíh búdí ã jĩgahat

¹¹ Bita weemdíh yeejép ĩ naáwáchah joinít, yeebboó queétdih ñi naóh bóod chũñuchah, áta túi tagaá. Obohjeéhtih, páant ñi niijcáh, weemjéh yeebdíh wã míic wēi naóhna caá. Weém oboh jumni dée wã jumuchah yuhna, queét yee bohénit “Jwiít caá bácah Dios ã bohéat túutni”, niijnítboó wã chah ĩ jumcan caá. ¹² Ñijeéh wã jumuchah, Dios ã naáwát túutni wã jumatdih júutíhna, ã wēpatjĩh weemdíh búdí ãpĩ teo wáacap jĩ. Páant ã teo wáacachah, dawá láa wunnitdih boonanit, nemépwádhbut wã yohop jĩ. Pánih chãjnit, jwiít cãacwã jwĩ jéih chãjca naáhdih ã wēpatjĩhjuh wã chãj júutap jĩ. Weemdíh eníhcannit ĩ yéejalichah yuhna, wã chũná yuhna, wã teo cádahcap jĩ. ¹³ “Pablo jwĩjeéh jumna, biíh tútchidih moondíh ã túi chãjat pah jwiítidih ã túi chãjcap jĩ”, ¿yeéb ñi níj jenah joí níit? Nihat tútchidih moondíh biíc yoobó wãpĩ túi chãjna caá. Obohjeéhtih, yeebdíhjuh wĩh pínah dinerodih wã uúbh tac buugácap jĩ. ¿Pánih uúbh tac buugácan, yeebdíh wã yéej chãjnit jĩ? Caán yeejép ã jumuchah, wã jĩgahna caá. Caán yéejatdih weemdíh ñi yohoó.

Ĩ pebhna ã jwúub jib bejat pínah

¹⁴ Nin wã naáwát pínahdih ñi túi joyoó: Chéne láa juibíniji buu ñi pebhna jwúub bejat túut caá wã chãjap, páant muntih. Ñi pebhna juibínit, yeebdíh wĩh dinero pínahdih con láa wã uúbhcatji pah, buu láabut wã uúbh tac buugácan níit. Níih

dinerodih náahcan, Jesúsdih táí joinít ñi jummat caá yeebdíh wã náah yacap. Wébít í mána í náahatdih wãhñit pínah nihcan caá. Obohjeéhtih í mána caá queét wébítboodíh í náahatdih ípí wũhup. Páant í chãjat pah yeéb wã weh panihñit ñi jumachah, wã náahatdih yeebdíh wã wãbhcan niít. ¹⁵ Ñi íip panihni jumna, yeebdíh búdí oinit, nihat wã bíbohatdih wëi wãhñit, yeebdíh wã teo wáaquíhna caá. Pánih teo wáaquíhna, búdí chunná yuhna, wã teo cádahcan niít. Páant yeebdíh chah wã oyochah yuhna, ¿yeéb weemdíh nump ñi oi niít?

¹⁶ “Pablo jwíjeéh jumnit, áih pínah dinerodih apí wãbh tac buugácap jí”, ñi niíj jéihna caá. Obohjeéhtih, biquína ñijeéh jumnit weemdíh nin pah ít niíj jenah joi tágaá: “Jwíh dinerodih moh yéejnitdih ã wũh wáacat túutnit, jwiítidih jéihcha dúuc wáiniabeh tagaá”, í niíj jenah joiná caá. ¹⁷ Páant í niiját pahjeh chãjni jumna, ¿ded pah tigaá caandíh wãta nih chãj? ¿Ñi pebhna wã wahnitdih nit beé yeebdíh wã jéihcha nuumát túutup? Páant wã chãjcap jí. ¹⁸ Jãtíh Titodih ñi pebhna bejat túutnit, biíh Jesúíhdihbat ájeéh wã pej jum bejat túutup jí. Páant ñi pebhboó juibínit, ¿Tito yeebdíh ã jéihcha nuumnít jí? “Nuumcánni caá”, ñi niíj jéihna caá. Jwiít chénat pah biíc yoobó jwí maáh ã weñat pínahdih chãjnit caá. Pánih jumnit, yeebdíh oinit, táinijeh ã chãjat pah, weembát biíc yoobó yeebdíh táinijeh wãpí chãjna caá.

¹⁹ Páant wã jãh niijíchah joinít, ¿ded pah ñita niíj jenah joí? “Caandíh jwí wëi niiját pínahdijeh caá ã bidip”, ¿ñi niíj jenah joí niít? Obohjeéhtih, weém Cristoíh jumna, Dios weemdíh ennit, “Ma táí

chãjna beé”, ã wêi niiját pínahdihjeh caá wã náahap. Yeebdíh teo wáaquíhna, ded pah wã chãjatjidih wã naóh beedánap be, jwĩ Maáhdih chah ñi túi jepahat pínah niijná. ²⁰ Ñi pebhboó wã juibínachah, wã náah yacat pah ñi chãjcah, búdí yeebdíh wã úum yacna caá. Páant ñi túi chãjcah, caanná juibínit, weembút yeéb ñi náah yacat pah wãta chãjcan tagaá. Pánihna, yeebdíh búdí wã jenah joiná caá. ¿Páantjeh ñi míc jãih niít? ¿Páantjeh bitaíh bií déedih ñi en ñinah íj niít? ¿Búdí ñi míc íja niít? ¿Biquína páantjeh ñih pínahdihjeh bid niít? ¿Bũubut páantjeh bitadih ñi yee naóh niít? ¿Yeejép dooná ñi jummatdih ñi cádah jwũhcan niít? ¿“Weém nihat jéihni caá”, páantjeh ñi míc wêi niij niít? ¿Tũbit ñi míc en naóh cádah jwũhcan niít? ¿Yeéb biquína ñi jenah joyátdihjeh niít ñi chãjap? Yeéb páant ñi chãjatdíh wã úum yacna caá. ²¹ Pánihna, ñi pebhna juibínit, ñi túut nũumcátdih wã enechah, Dios weemdíh áta tíicat túut tagaá. Jon jãtíh yéej chãjnitji dawá páantjeh ñi yéej chãjatdíh cádahcah enna, búdí wãta jĩgah taga. Í náah chãjat, yeejép chãjíhat jenah joyát, ñi náahat pahjeh chãjatdihbut ñi cádahcah enna, búdí wãta jĩgah taga. Páant ñi chãjatdíh páant bóojeh ñi cádaháa, caanná juibínit, wã jãihcat pínah niijná.

13

Pablo ã pé naáwát

¹ Jon yeebdíh chéneji juibí enniiji bũũ bejna, biíc peihcanni láa bejat túut caá wã chãjap. Pánihna, ñi yéej chãj cádahna, túiniboodíh túut nũumní, weemdíh ñi túi páñaá. Ñijeéh jumnitdih ñi yéej chãjatdíh cádahat túutnit, Moisés nin pah ã niij

naóh daacátjidih ñi túi náhninaá: “Deddih ñi peéh chãjat pínah jãtih, caán ã yéej chãjachah ennit, chénewã, biíc peihcannit ï enatji pahjeh ï naáwá naáh. Páant moonjéh ï naáwát túttimah, ñi peéh chãjachah, ã táibipna caá”, Moisés át niij daacáp tajĩ.* ² Ñi pebhna wã jwúub juibí láa yéej chãjnitdih nin pah wã niij naáwáp jĩ: “Ñi yéej chãjatdih cádahnit, túiniboodíh ñi túut nuumú. Ñi cádahcah, jwúub juibína, wã peéh chãjbipna caá”, wã niij jĩ. Páant wã niijátji pah, buu ñijeéh jumcan yuhna, queét páantjeh yéej chãjnitdih, yeéb nihatdihbut, wã jwúub naóhna caá. Páant bóojeh, ñi yéej chãjatdih cádahnit, túiniboodíhjah ñi túut nuumú. Ñi pebhna juibínit, ñi cádahcatdih enna, búdí wã peéh chãjbipna caá. Yúup wã jumchah, “ ‘Wã peéh chãjbipna caá’, niijná yuhna, ã peéh chãjcan niít”, ñi niij jenah joicá bojoó. ³ Cristo ã naáwátidih naóh yapani wã jummatdih ã júutat pínahdih bidna, páant wêpép weemdíh ã peéh chãjat túutachah enna, ñi jéihbipna caá. ¿Búdí ã wêpatjĩh yeebdíh ã teo wáacátjidih ñi náhnican niít? Yeéb yéej chãjnitdih ã peéh chãjat pínahbut biíc yoobó wêpép ã jumbipna caá. ⁴ Jwiit cáacwã jwĩ wêpcat pah Cristo wêpcanni jumna, cruzboó át wun wáhp wát jĩ. Pánih wunna yuhna, Dios ã wêpatjĩh boo pud jéóhni, buu páantjeh báadhni ã jumna caá. Cruzboó ñuhna, wêpcanni ã jummat pah weembút wêpcanni wã jumna caá. Wã jenah joyátjĩhjah yeebdíh wãta jéih teo wáaccan tagaá. Obohjeéhtih, Cristo wãjeéh jumna, Dios ã wêpatjĩh yeebdíh teo wáacadih wã juibíipna caá.

* **13:1** Dt 17.6; 19.15

⁵ Yeéb mícjeh nin pah ñi míc niíj wúbh joyoó: “¿Ded pah wã chãjatji? ¿Yoobópdih Jesúsdiñ wã jenah jói niít? ¿Caán ã náah yacatdih wã túi jepah niít?” ñi míc niíj wúbh joyoó. Caandíh yoobópdih jenah joiná, ã náah yacatdih ñi túi jepahachah, Jesús ñíh caolihboó ã jumna caá. Obohjeéhtih, yoobópdih caandíh jenah joicán, ã náah yacatdih jepahcan, áihwã ñi nihcan caá.

⁶ Weémboó caandíh túi jenah joiní, ã náah yacatdih jepahni wã jummatdih wã jéihna caá. “Weém Jesúsíh caá”, niíj yeeni wã nihcan caá. Páant wã jummatdih yeebdíhbut wã jéihyaíhna caá.

⁷ Ñi yéej chãjcat pínahdih náah yacna, Dios yeebdíh ã túi teo wáacat pínah niijná, búdí wã wúbhna caá. Ñi pebhna juibínit, páant ñi yéej chãjcatdih wã enechah, weemdíh Dios yeebdíh ã peéh chãjat túutcan niít. Páant ã peéh chãjat túutcah, wã wëibipna caá. Obohjeéhtih wã peéh chãjcatdih ennit, “Pablo Dios ã wëpatjíh queétdih peéh chãjcan, Dios ã wahní nihcan nacaá”, ñi niíj jenah joyóchah yuhna, wã túi wëibipna caá. Dios weemdíh ã bohé jibat túutatjidiñ ñi jéihyat pínahdih wã náah yacna yuhna, yeéb ñi túi chãjat pínahdih chah wã náah yacna caá.

⁸ Ñi yéej chãjatdih cádahnit, túiniboodíh ñi túut nuumátdih enna yuhna, yeebdíh wã peéh chãjachah, yoobópdih áta nihcan tagaá. Pánihna, yoobópdih chãjíhna, yeebdíh wã bohéibipna caá, Dios naawátidih túi beh joinít, chah ñi jepahat pínah niijná.

⁹ Yeéb Cristodíh ñi túi jenah joyóchah, Dios ã wëpatjíh yeebdíh peéh chãjat ã náahcah, búdí wã wëibipna caá. Pánihna, Diosdih búdí wã wúbhna caá, ã weñat pínahdihjeh ñi túi chãjat pínah ni-

ijná. ¹⁰ Dios ã wēpatjĩh yeebdĩh peéh chãjĩhcan, ñi pebhna wã bejat pínah jãtĩh wã daác wahna caá, yéej chãjatdih cádahnit, ñi túut nuúm páñat pínah niijná. Dios ã wēpatjĩh yeebdĩh jĩgahaĩhcan, wãpĩ tãí bohéna caá, ñi tãí jummat pínah niijná.

Pablo ã pée túyat túutat

¹¹ Bũũ wã úudwã panihnitá, yeebdĩh wã túyat túutna caá. Cristodih chah jenah joinít, táinijeh ñi jumúú. Nin wã naóh daacát dih ñi tãí jepahaá. Cristodih chah jenah joyát pínahdih ñi míc teo wáacá, biíc dih tãí jummat túut niijná. Páant ñi tãí jumuchah ennit, Dios ñijeéh ã jumbipna caá. Caán jwiít dih búdí oinit, míc oyat túutna, jwiít biíc dih ã tãí jummat túutna caá. ¹² Jesúíhwã jumna, ñi tãí wēi úúbú. ¹³ Nihat ninjĩh moón Jesúíhwãbut yeebdĩh búdí ã túyat túutna caá. ¹⁴ Yeebdĩh búdí wã úúbhna caá, jwĩ Maáh Jesucristo yeebdĩh oinit, ã tãí teo wáacat pínah niijná. Dios búdí ã oyatdih ñi jéihyat pínah, Túini Espíritu ñijeéh ã jummat pínah, yeéb biíc dih ñi tãí jummat pínahdihbut wã úúbhna caá. Pánih úúbhnit, yeebdĩh búdí wã túyat túutna caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2